



濟寧州志

七八



DS
793
S42
C6532
1785
v. 8



濟寧直隸州志卷七

建置一

古之治天下至纖至悉也然大約事神治人二者而已于是立之壇廟以時其報賽爲之學校以申其孝弟董之官師以正其表帥城郭以衛之甲兵以守之豈徒曰具文而已哉蓋從古帝王體國經野設官分職以爲民極之大法也土地有大小而政事無偏全文武之道布在方策其亦不待他求而得之于此矣今叙自城池以至屯衛爲建置

城池

州城自明初易土爲磚且鎮以重兵由正德以迄明末屢經寇攘其捍禦之備頗爲完具城壕之外復引洸水環之以爲重險又增益樓櫓備製火器而縉紳絃誦之士亦爲運籌荷戈保障崇墉濟州屹然爲重鎮噫亦雄矣昔呂新吾之居鄉也以寧陵城惡首議展拓而新之諸故家咸不便獨違衆論竟以成功且爲守城書以遺後人其後乃卒受其庇故曰安不忘危治不忘亂此有備無患之道也今以鄭氏守禦記附焉

州城舊以土築明洪武三年濟寧左衛指揮使狄崇重建易以磚高三丈八尺頂濶二丈基寬四丈周九里三十步四面各二里九十七步五分女牆舊志云凡三千六百

國朝順治初并一千八百然鄭與僑守禦記則明末時已并之今垛口惟七百六明時大修可考者萬歷十年指揮楊方亨崇正時知州董則喻也

國朝大修者三總河楊方興知州吳樞及史錦又南北門樓知州藍應桂修四門左右舊名有小門今惟

南東北三門有之

舊志參兗州府舊志及採訪

明陳伯友郡侯倣我董公修城記濟寧東省一都會也天下無事爲商賈貨財之所輳設有不虞則草澤之雄耽耽思據之故曹操爲兗州而人語之曰河濟天下之要亦將軍之關中河內也則濟洵重地云其城頗稱堅厚而屢圯屢修相傳已久天啟初戍樓委謝垣牆崩壞適董公守是邦則念曰城之不修守土者之責也乃謀之諸紳及諸父老咸以爲役大而難顧又念曰事在不可已烏可以無措而已于是亟請于上官得存留二千緡公曰是可與興事矣乃簡官

役董其事而以鄉耆有行者覈之諸匠作日給錢木石磚灰隨時償值而不使冒破有不足俾各里以夫助之人均其勞于是趨事者衆而工日起至甲子落成頽者彌壯傾者彌堅太白酒樓益增而高宏麗稱是而東南戍樓標以奎星示興文也西南戍樓標以宗聖示景賢也及四門樓各戍樓其崇煥莫不如之余以差過里門覩茲成蹟而文學請余爲記余因感于任事之難也凡事之興也暗者昧之怠者弛之不昧且怠而且爲築舍之所搖半途之所阻則事亦旋

興旋廢惟夫燭于當然奮于必然而又永堅于
不得不然故能樹功不朽若城之修也慮金錢
無措則不能修慮請發不裕則不能修或又慮
開銷易於起議動衆易于賈怨則亦四顧傍徨
而不能修董公銳意擔當而一切異慮悉以屏
之故成也當壬戌妖賊之變不旬日墮三城濟
縉紳官民晝夜荷戈登陴惶惶慮不守有如城
若此而復何慮哉卽今餘孽未盡熄不逞尙生
心而環觀此氣象必戢其逆志銷其邪萌也則
數仞垣賢于十萬師矣而尤有進者濟三面環

水營無可厝馬無可馳儘可據以爲守惟北方
爲諸省通衢平坦曠蕩易爲受敵說者謂浚隍
而使之深通水以成大渠其故河俱在廣而廓
之匪艱也如是則周圍皆水而睥睨者益當錯
愕于四塞之險而濟輦固矣是在圖地利者加
之意耳公二載前已遷河間貳守合郡攀留得
以府銜仍管州事至此譽益騰功益茂行且超
擢樞衡乃其蹟之在濟者則固與濟城永存矣
四門南曰宣阜榜曰野入青徐東曰綏華榜曰鄒
魯接壤西曰萃成榜曰獲麟古道北曰宗翰榜曰

雲連海岱其榜皆總河靳輔書東門迤南水門一

處鉄窓

舊志
下全

四門樓南曰翽鳳崇正十七年燬

國朝順治十二年總河楊方輿重建北曰望嶽東曰
聖化燬康熙二十年總河靳輔修西曰思麟翽鳳
樓榜曰金湯永奠望嶽曰拱翼神京聖化曰氣連
海岱思麟曰汶濟澄清總河奉天子成龍書其樓
在月城者南曰會通北曰拱辰東曰賓暘西曰近
治此樓亦總河靳輔重建月城女牆凡三百今惟
會通存餘廢矣

四角樓在東南者曰鳧繹康熙初改名五奎東北者曰洸泗西南者曰凝翠改爲曾子樓以三省書院改運河同知署移像於此西北者曰耀金

敵臺四在得勝樓之西曰壁宿臺北門之東牛宿臺西門之北箕宿臺西門之南井宿臺敵臺與城平自內而下砲眼三層明末所建壁宿臺砲眼四十四牛宿臺砲眼四十六箕宿臺砲眼三十三井宿臺砲眼無考今皆廢

又舊周圍點臺六百一十八砲臺二十一今廢惟存

東面砲

臺五

太白樓在翺鳳左明洪武二十四年狄崇建重修

者正統中都督趙輔成化中副使張穆

國朝總河楊方興知州陳烜史錦樊濬生藍應桂

文參

卷

元武樓在翺鳳樓右天順元年燬重修八年又燬

廢

舊志

得勝樓一名文勝在望岳樓西又名奎光樓廢

明楊士聰奎光樓塑像記濟之北城樓有翼於
右者曰得勝相傳武廟時流寇攻濟之西北城
已隳矣守者中夜詭爲慢城雉堞肖焉黎明寇
遙見以爲神乃遁去用是建樓城上蓋以旌武

功也然濟郡鬻宮故在城之西北隅相距非遙
樓之建且久有爲鬻宮謀地形者以爲樓在宮
之西不若在宮之後乃爲改建北城上與鬻宮
直而易其名曰奎光至是諸君子暇而登眺謂
樓之虛無所奉也遂醵金募工塑魁星之像於
其中焉夫魁斗柄星也奎主文章而實魯之分
野星也二星不同卽世所圖爲像者非真有之
也因魁字而肖似爲之耳然世俗相沿皆以爲
文事之應則其異同有無亦姑置勿論但余因
是而竊有感也夫諸君子之爲是舉也蘄以爲

文事重也夫今之所不足者豈文也哉四郊多
壘天下事且孔棘矣褒衣博帶之儒所執以取
世資者一切無所用之而憂時者鰓鰓於武備
之不張與積習之難振近者主上雅意重武隆
賓興之典至與文試等而一時典試文臣復以
不克稱旨皆斥罪有差蓋武之於今日極重矣
安有樓以武建而反被以文名加以魁像也者
余竊有說於此文武者人才之異號豪傑者文
武之總名卽欲分之而無可分也第世無真文
人耳真能文者其人必武昔齊人伐魯冉求爲

左樊遲爲右卽我朝靖遠威寧功業炳然夫非
出自學宮舉以制科者乎詩曰矯矯虎臣在泮
獻馘泮者師儒誦習之地也而曰獻馘曰虎臣
此以知崇文之不必輕武而重武之不必抑文
也然則斯樓也卽名爲得勝名爲奎光更從而
塑像之而引以屬於學宮亦胡不可諸君子皆
一時名流其結社爲文也有重瞳破釜沉舟之
氣夫士之所以就功業者氣也今日爲文戰之
雄異日卽禦武之資方將於斯樓卜之吾願諸
君子深自愛也庶幾以余言爲左券乎

○王第魁重修南門城樓記濟城頭舊有層樓四面
暈飛相映而南門樓則俯瞰河流運艘啣尾而進
尤五方輻輳之地而一郡保障之巨觀也會甲申寇
亂樓燬巨觀遂缺及我

朝鼎定大司馬楊公行河建牙亦既疏濬有成績又
修文廟以崇文修武廳以講武修東西官廨以奉星
輶重

王命卽加意雉堞煥然增高至是復創建南門樓俾與
先修之外樓屹然並峙使人望焉而知爲雄鎮且不
借財于府庫不役夫于里甲一切材具悉

捐俸金平市之檄城守陳遊戎率其城兵以築
城樓事順而人悅子趨忘倦始於順治八年五
月二十五日至本年十月二十五日爲時無多
而告成是役也其美有五北拱

京師南控青徐所以尊一統之勢也踞漕運之咽喉
消奸宄之睥睨所以造萬年之安也集畫舫鳴
橈於城下而稽其先督其後轉輸若加之迅者
所以居邇而致遠也萃輶擊肩摩于城中而撫
以仁教以義愛戴若加之固者所以寧下而親
上也役起而民無物力之費役畢而民有捍禦

之樂大司馬公之舉者百廢而此其一民之受
于大司馬公者百仁而此其一誠哉器博者無
近用道長者爲功溥也夫一役而五美備其于
治也恢恢乎有餘裕矣古之論治曰大抵取便
國利事多者則可爲殆知大臣之用心也爰勒
貞石以垂不朽公諱方興字淳然滿州籍遼東
廣寧人順治初年以少司馬履任累晉大司馬
太子少保

○靳輔重修濟寧州城樓碑記任城爲視河者駐
節地以其處漕運咽喉也然襟帶汶泗扼水陸

之衝自古談形勝者率指爲山左要區故環師以鎮而亦隸其標於河則是天庾之飛輓與封圉之綢繆厥任維均有無容岐視者矣余于丁巳春拜督河之命自皖而北時淮揚罹昏墊者十餘載黃流躡淮內奔決漭無際以故荒度南省者無虛晷其駐任則十不一焉然下車時自謁宣聖外卽閱闔隍計保障乃目覩戍樓之剝落岌岌有就圯狀不禁蒿目者久之爰稽任城之制匝雉樓櫓凡十有三暉映相望以成犄角者舊矣其在南門者曰翮鳳樓明末遭寇燬及

順治辛卯間大司馬淳然楊公重新之至今三十餘年南樓之顛以翬飛者公之澤也其自南遡東而北而西爲舊樓者十二楹歲久不獲葺以故摧蝕日甚守土者率以費不貲時絀莫敢請嗟乎任之爲任猶昔也其處水陸之衝而爲山左之要區自若也倘僅曰飛輓是亟而坐令守禦頽廢莫之省憂將國是民瘼之謂何耶惟是爲工旣博誠有非一手足烈者於是援沂城捐修例特疏以請奉

制曰可遂檄諸寮案倡率集事并檄監司郡丞輩董成

之始於戊午之夏迄辛酉冬告落成焉夫以此
年來當軍興時絀之餘乃不煩民力而能壯金
湯而衛民者則皆仰邀

俞綸之所致也若夫榱棟之鳩工也有不能無新故之
相推斯有不能無綢繆之預計其勢然也如以
傳舍一官而秦越之則舉者安在其不隳耶苟
念環師以鎮之義凜守禦保障而時省焉則庶
乎新者常新而一旦暉映犄角之觀也是所望
於後之君子矣茲因守土者之請用勒珉以紀
歲月其襄事姓氏例得並書於碑陰云

○吳樞修城記官守之於城池重於倉庫雖承平無事偏隅小邑亦不可使有殘缺不完况濟寧地當南北咽喉漕運鎖鑰河道總督統攝四營將士駐節於此誠重鎮也乃城之東南北三門層樓櫓棟垣墉勢將就圯西門外樓闕焉未建而城垣亦數處坍塌歷十餘年未有謀及者定例修城不得動錢糧皆須急公捐備前任奉行修理雖經估報所需工料終未修理樞蒞任後詳報捐修於康熙三十三年正月興工先修南門樓一座東門樓一座城垣四處砲臺一座凡

辦木料磚灰瓦石諸物及工匠夫役俱照民備
平價給發計其費銀一千二百六十五兩二錢
零是役也河督于公倡捐銀六百兩紳衿捐工
錢七十九串之外餘俱檉勉捐所委督工之官
則稅課局大使李一英南城驛驛丞章射斗也
尚有北門外樓北城得勝樓及南城砲臺城垣
一段未修西門外樓未建至三十六年又詳蒙
河督董公劄移撫院李公暨藩臬各道憲共捐
發銀七百三十兩復興工修完北門樓暨南城
砲臺計工料共費銀九百三十七兩八錢有奇

內糧自勉捐二百餘兩所委督工之官則吏目
劉汝本稅課局大使沈廷棟也兩次共修城門
樓三座及城垣五處計三十二丈庶幾壯麗完
固然無絲毫累及里民亦未嘗短價一物白役
一夫也按查前任原估冊報數處工價四千餘
兩糧奉上臺允許所請捐資飭修敢不躬親料
理凡一磚一石一夫一工必自稽察總不假手
吏胥是以比原估之數得節省過半當興工之
始有爲糧方切不敷之慮不謂節省如許若非
躬親其事必且金錢虛費而工程終致不完亦

烏從而知其弊天下工役之事核實之與否類如是夫至西門外樓暨北城得勝樓緣河督董公連歲經理淮黃南工多事未暇顧及櫪比年亦以公務殷繁無力捐資致此二處未能建復尙有待於後日云

乾隆二十八年正月知州史錦重修記略四城樓四角樓並外面牆砲臺垛口以及四門馬道其費紳士李文彩鹽行茹林等公輸共九千一

百四十兩有奇

文卷

城河周十三里二百三十五步濶四丈五尺深一

濟寧直隸州志 卷一
丈五尺

弔橋四南門曰飛虹橋北門曰朝天橋東門曰通
泗橋西門曰通津橋

○明鄭與僑守禦記天啟二年壬戌五月妖人徐
鴻儒倡亂西陷鄆東據鄒滕濟處其中時總河
大司空陳公道亨僉憲熊公文燦約紳衿商守
禦之策衆曰濟城堅可守但貨財輻輳於關棄
關擁孤城無益也欲守關莫若練土著便遂簡
四關丁壯得數萬人分爲九營曰太平曰奏凱
曰勇奮曰仁育曰義正曰智勝曰信義曰文成

曰元武擇士民之膽智者統之此九營鄉兵之始也閏八月寇平二公相繼遷去濟人講武不怠雖修練儲備匪一朝夕然次第舉行有可述而誌者城堞原二千六百有奇恐口多矢集人少力分間塞其半止存一千三百有奇每堞以兩夫守之督塞之法一口給錢五十文磚石聽夫自取不移時而工告成此併堞之始也按堞製巨斧一三眼鎗一猛棍一棍用榆棗高與眉齊員其本期於可握稜其末期於可擊此製械之始也堞口各製箭簾一四圍以木中實以竹

或東遽代之竹蘆宜橫不宜豎橫則矢不能入

用架承置陴上此製簾之始也城每面用紅夷

砲十位滅敵等砲百位拐子砲浮梁機

宜作佛郎國名

又倍之紅夷得之題留滅敵等砲括貴招商往

山右置買此製砲之始也鉛子大小視砲口爲

度俱預爲製造以兩孝廉兩諸生監之造成分

貯各城樓與各守領之家而嚴核其失落此製

彈之始也火藥欲細欲乾細則存乎人工乾則

全在于酒如入酒時稍雜以水臨期點放必有

濕滅之患開局普照寺而以官儒之勤慎者監

視買酒入酒必身到眼到故火藥多而皆適於
用硝磺得之上官清查私販與罰贖不足則平
價易之此製藥之始也藥先貯西寺之萬佛閣
東寺之伽藍殿燬而藥化不存因買西寺僧
人真秀空地掘深數丈建庫房三間嚴其鎖鑰
高其藩垣專人典守此製庫之始也砲乘高乃
能及遠四城按方建二十八臺火砲分列其上
仍慮敵臨城下大砲無所施於城之寔敵臺左
右各築小臺一以備順城砲之用臺上俱以木
屏爲障又起高架而覆其顛以蔽流矢心閒手

閒點放不致錯亂此築臺之始也砲碗雖多器具須全凡砲車砲鏟以及榔頭春棍竹筩藥袋之類無不畢具貯有地而載有冊此製具之始也有器患於無人選兵三百名分布各臺專習火攻擇土官之曉練者督之餉則加諸地畝有事不許調發名曰城守營此城兵之始也兵不練不精練須有其地北城建將臺設轅門按期城操以行賞罰此教場之始也於城瞭眼中貫木爲工字形以撞雲梯又用兩長杆釘木板於其上視雲梯所在向梁上掩之名曰雲梯蓋此

禦具之始也八樓各設遊兵以五人爲一伍一人執小旗二人持鈎二人持斧凡雲梯所在分頭往援專擊梯而登城者此遊兵之始也磚石須大滾木須粗聽堞夫採取有力之家不得阻撓此木石之始也兵無盔甲不能對壘時有贛州蘇州解京盔甲總河題留頒給四城光可耀日此盔甲之始也四面按方向各臺按星宿俱需旗幟倉卒不備命尼僧各募於大家之婦女越宿而就此旗幟之始也八樓各懸一鐘四關塞口亦然何方有警關鐘先鳴樓鐘繼之人卽

登城此號鐘之始也四門樓與太白得勝二樓
上官與大紳居之四角樓領兵官與監紀孝廉
居之二十八臺每臺擇紳胄士民之勇敢者一
人爲首各選勇士五十人以臨敵可其生死爲
主凡臺左右之槩夫卽隸之一人鎮定五十人
俱不驚潰二十八人鎮定一千四百人俱不驚
潰一千四百人鎮定二千六百槩夫無有敢驚
潰者此分汛之始也城半懸燈籠城下置塘火
每十槩以二夫瞭望一更一換官紳分班巡察
此夜防之始也每十槩以一青衿總理分住

堡塼夫則五人共起一窩舖嚴其火燭與賭飲
有力者聽令自備窮民量給料價或勸富室情
願者資助之此窩舖之始也十塼備水甕一鉄
鍋一或借之行戶或括之富家酒店此備水火
各器之始也城頭旣備城內宜嚴各巷口修柵
欄一座而以本巷兩諸生監守本街餘丁輪司
啟閉城外有警嚴禁行人遇有火災聽官司差
人救護不許出柵驚竄此設柵之始也嚴保甲
之法官紳分地挨查但有可疑立加清理此保
甲之始也城內旣清隨嚴門禁每門正官一員

兵官一員大紳一孝廉四青衿十分班坐守出入譏察此坐門之始也城之西南狀元墓高與城齊東北西北兩面皆空濶受敵各造虛心敵樓一座每樓或費五六百金或費千金以皆解嚴之後捐助有餘故及之此敵樓之始也護城河水僅一帶官紳大姓分地䟽排自一二丈以及三四丈不等城之北西兩面舊有重河但苦淤淺亦分工開濬又官築楊家口埧挽洸泗諸流遶城之北之西以達於漕城得設重險焉此䟽河之始也城所恃者關關無所恃何以爲

禦計聽民挑濬濠塹作牆其上約十餘里屹然
金湯其資則輸之商賈富姓窮民亦樂以力自
効此外城外河之始也城旣設又分立寨口起
架敵樓弔橋每寨屯兵爲戍草橋一草橋之西
李家莊一濟安橋一藍衣堂一玉皇廟一埧口
一陶姑寺一南城七舖一卧佛寺一文昌閣一
炭溝一充軍倉一菜市一東關頭一馬驛橋一
楊家口一驢市一娘娘閣一茶菴一牛市一凡
立寨二十餘處各立公製砲礮無事司盤詰有
事嚴守禦此外寨之始也濠塹雖設尙苦窄淺

決金線牖令湖水盡灌城之四週又于運河下

流如任城

俗作在城

趙村石佛等牖俱爲填閉仍設

遊兵防西十里舖之盜決四關一望皆汪洋矣

此積瀦之始也凡敵遠外城砲及之以護關敵

近寨口砲及之以護城中外一體上下一心此

交衛之始也自是而明偵探選兵民中捷足數

人厚其廩給四出遠哨耳目旣明防閑益力此

哨探之始也自是而聯鄉村四關各營於附近

村落各發號令每村自成一旅數村共成一營

能守則官兵爲之聲援以重藩籬不能守收入

各寨以資捍衛此聯絡之始也人多用繁儲蓄
宜講城中如郭家園姜家園皆空地可構廬舍
聽鄉民分租營建糧草預貯其中以備進城食
用大姓莊儲及各州縣水次倉俱移城內一以
寔城一以清野此儲蓄之始也凡城關之外俱
係要地各伏萬人敵等毒物又要虛實相間令
敵莫測此埋伏之始也凡茲各項爲費不貲出
之河道贏餘者五道州罰贖者二土人捐助者
三捐助之法請公祖父母于公所紳衿畢集矢
公矢慎逐大姓面爲推敲衆論僉同官爲註冊

不許紛更其餘中戶每隅選行優八生登門勸諭但取樂輸不强人以不堪此捐助之始也冊既定鄉約傳催完納每隅以兩孝廉四子衿監收每晚總交一大紳處凡遇公用首事者具領狀于大紳處關取主收者不主貯主貯者不主支官吏不得過而問焉此收放之始也諸事既舉不特弭亂抑且救災濟遇大饑者三開粥廠五十餘處煮散皆委士人且恤老有社保赤有社所活不下數萬以素有備也大疫者再或施藥餌或掩骨骸一倡百和全無慳囊以素有備

也大火者一癸未二月城東北東南兩隅頃刻
俱燼萬戶喪氣通融安置委曲週全人無遷徙
之苦以素有備也不寧惟是歷年來奢藺訐於
南闖獻擾於西援勦諸兵繹絡不絕少逆顏行
焚掠立起至濟獨歛跡以過以素有備也土寇
蜂起北如李青山西如李鼎銳南如張文字東
如楊三畏號稱數萬三十里內無敢置足以素
有備也戊寅壬午東省殘破者八十餘處兗郡
殘破者一十九處環攻濟城力守不下至今稱
南北雄鎮以素有備也究其留心民社加意綢

繆總河如張公國維黃公希憲監司如馮公元
颺楊公毓楫鎮將如張公文昌府丞如管公鳳
鳴閣公調鼎州守如董公則喻王公孫蕃胡公
鳳閣美當備書至於紳胄士民人分猷家宣力
名難悉紀其終始於事而心血俱嘔者則濟寧
衛掌印揮使張公世臣孝廉任民育也於戲前
事者後事之師倘使三十年桑土至計無所傳
述前人苦心旣就湮沒後人何所據以爲繼起
之藉乎余共事甚久諸大計俱叅末議知之頗
悉故粗著其概令後之君子考稽故實宦此地

者勿視官爲傳舍畢力經營生此地者常慮城
爲漏舟同心補葺庶名與城而俱永家與邦而
均安豈非不朽盛事哉此余載筆意也

遺事記

○劉淇西門水溝記歲在己丑濟寧自四月積雨
至六月十日霖雨大作城中水暴長衢巷皆沒
屋廬壞十六七民爭趨城二十日雨繼作水又
增長挈舟往來八月二日復雨自子竟巳水倍
前士民號於州太守趙公鶴之請開水道由西門
洩西南西北兩緒之水從之掘至數尺見甃石
甚長頗有人記憶此下故有溝以洩潴水但歲

久塞耳于是相與計東城獨有水門故瀦水卽
日消落今開水道暫耳非遠久畫不如因其故
迹遂增甃之雖不及水門洩水之速亦庶幾少
紓暴溢之患僉憲劉公及運河司馬許公聞之
嘉勉鼓舞于再于三捐石飲金腆厚惻怛于是
戶勸人奮唯恐在后不一月溝成自城門至閘
閣一十三丈南至南瀦九丈五尺北至北瀦十
一丈共三十三丈五尺四面甃石受水之口閉
以石以闌穢敗導水之口閉以鐵以備姦竊
夏啟治以防壅塞費凡二百金以上于是

相與感前日之墊溺疾苦而樂寧止于方來也
來告淇曰非吾僉憲司馬州主不及此子其記
而刻諸石以示無窮淇僑居濟寧三十餘年先
龔在茲雖羈旅乎卽州民矣且前日之墊溺疾
苦固備嘗之則方來之寧止亦將波及敢以不
文辭爰系以詩曰我聞古昔政在安民好好惡
惡如營厥身高城深塹所以守邦苟民不有邦
孰與守其或蒙焉乃憚革興捍患禦灾縮朒因
仍受人牛羊且羸以瘡彼牧謂何□而□邪歲
赤奮若霑潦薦凶蕩蕩濟城浩於湖江婦孺哀

號坐髡以逝睥睨之間瓜廬周遭剗削萬屋如
郊如坳汎汎揚舟載浮載憑昏墊漂搖穀泄隄
腫自夏徂秋邦人大恐乃號于州以憂仁君西
闔渠開濤決雷奔藹藹僉憲敦敦司馬弗康弗
愉哀我填寡厥渠乍通匪爲巡圖石而竇焉乃
彼舊模輦石其崇欽金其豐爾急爾患其可從
頌乃嘉勞之又勤劭之其有不勸衆叫笑之雲
鍾麟集金錐彪舉不日成之慶忭歌舞于萬斯
年民旣寧止于萬斯年公多受祉踽踽羈旅秩
秩

月某日

衛園集

積水橋在南門之右城河由此與運河通

永濟橋在西門外武勝街北康熙五十六年州

人王隆卿等重建

據碑○橋南下有馬冢乾隆丙戌知州事上元龔孫枝埋

馬于此

青雲橋在永濟橋西乾隆七年劉靳等姓重建

據碑

按城西之水汙漫無歸順治初總河楊公會

開小河于狀元墓西引入馬場湖今不然南

則出會通橋西則由青雲永濟二橋歸城河

遶城西南角由南門之積水橋入運河

○金鄉縣城周七里三十步高二丈三尺基濶二丈
七尺頂一丈二尺門四東曰東作西曰西城南曰
南薰北曰北拱池濶四丈六尺深一丈一尺舊本
土城創始失考明萬歷六年八年九年知縣楊楫
杜靡李鳴世相繼全甃以磚

國朝康熙四十九年知縣沈淵重修乾隆四十二年

知縣王天秀重築

兗州府志
泰縣志

周永春守城記繕補晉西鄙民習絃誦不聞軍
旅壬戌之夏有妖黨徐鴻儒等陰謀不軌聚衆
賈敬屯其地係曹鄆之交勢頗震鄰五月初九

日邑侯楊公甫受事公以館陶調緝邑道聞寇
警驅車疾馳心火內鬱濕毒外侵方臥閣調攝
無何十四日郵變見告矣是日克西道用令旗
調鄉兵一千名催檄如雨城中人心洶洶公詰
旦不遑盥沐力起視事登城周覽調度機宜計
梁口二千一百有奇每一梁壯丁一名五梁豎
一小旗設棚一燈籠一二十五梁豎一大旗爲
一牌青衫領之在城杆夫不敷取之鄉間又紳
士富家各助夫有差而二千一百餘名咄嗟立
辦以丁壯枵腹難用置簿勸輸時李守緒

先樂輸衆競輸恐後不數日有糧七百餘石每
丁日給糧二升凡城守之具如擣石滾木悶棍
灰瓶鎗鈎遮牌之類靡不咸備晝觀夜聽勞逸
更番靡不均適城垣損壞者築口低下者腰鋪
傾圯者靡不修葺又中取河夫濬隍務使深濶
足資防禦又令四門設夜巡遴青衿中勤敏老
練者若而人儒士武生中勇健有志畧者若而
人俾分任厥役委重廣文孝廉各一人挈其綱
領一切巡察之法靡不詳備公每夜周歷四門
不少休暇方是時公受事伊始百事皆創無可

因仍拮据荼苦有難言者然其應變倉猝而立
法井井如此法立矣又以恩澤未孚人心未固
一旦有警各鳥獸散乃率紳士耆老詣告于神
揮涕而言曰某不敏待罪茲邑誓共存亡所不
與父老子弟堅心死守而有二心者有如日語
畢大哭紳士耆老亦大哭公又虞城中或容奸
宄爲家置門單互相稽察更擇殷實子弟素嫻
弓馬者分方巡邏至於麻搭鉤杆水缸一切救
火之具隨所分之巷而一一備之當其事者無
不體公德意人人勤慎內防已嚴又虞外來

黨溷入城中於是南北西三門皆堦塞之獨留東門以通往來令丞尉輪司啟閉又擇老練者四方專司盤詰佐以青衿練達者數人驗其出入給以票記衆所素識者方與之非是則不得有強梁者輒械治之奸人用是凜凜不敢窺左足焉又聞賊黨焚燒大野四關則請遼將僑居者爲統帥選四關壯丁併遼將所帶健丁千二百餘人晝則合營團練夜則分守要路金鼓杆槓之役咸相呼應又虞營伍初立器械不足軍聲未震公先爲捐俸佐領廣文以次輪助集匠

四十餘人倍日給餼刲大砲十六位神鎗千杆
五月二十日偁家樓賊平縉之鄉兵卽前覓西
道所調者回至鉅野暫憇遇賊盤據梁家樓者
於六月初十日東徙鄉兵尾其後十三日至邑
西絕河集男婦逃竄者肩摩于道公亟延遼將
於東門樓謂之曰寇至矣公宜領新兵迎擊大
砲在前馬步軍分兩翼突衝可獲奇功但秣田
正茂勿墮伏方爲完策耳將行虞士餒下令城
中各有麪餅餉之以故人人踴躍又虞鄉兵不
齊兵力未厚則令二尹領守東關之鄉兵及河

夫數百人并糾集陽山大義白蛇等處之鄉兵約三千餘人與遼將新兵爲助時賊方在大義集北炊未畢我兵鼓行而前炮聲震天賊棄釜中熟糜踉蹌而東我兵直前追躡雖斬俘不多而賊膽已落此六月十四日事也次日賊至卜居集隔旦東行不敢焚掠逢衣冠輒偃僂問姓氏或散錢與童子以結其驩觀者如堵有諸生王姓者并僕誤入賊中賊令其僕汲水夜分乃罷臨行賊首謂之曰我本欲襲爾邑緣邑中有某知兵不得不避去蓋以余曾待罪遼左與聞

兵事又遼中官弁健丁避難投余者甚多爲賊所憚故耳十六日晚賊至鄭家堰次早由鄭家堰過河東九月二十日河東賊據滕邑食匱潰圍而出挺而走險淮兵披靡勢如封豕長蛇將薦食縣境公下令內外防禁比前倍爲劼愷令遼將統官兵鄉兵防堵于趙家口大孟店霄雲寺等處賊知有備由縣雞黍集西奔謂鄉民徐姓者曰知爾防備甚嚴又某督領遼兵我疾馳而西毋我窮追我在北掉白旗不爲焚殺事噫嘻賊兩過縣境不敢近城誰之功也所有守城

諸方畧可法于天下傳于後世余記其巔末如此雖余不敏無能佐公末議然公調度有法感孚以誠燭事如燃犀聞言如納谷則余亦庶幾得展一籌云公諱于國山西太原府陽曲縣人護城堤周十一里高九尺厚一丈二尺

周永春修堤記余邑大堤周圍一千六百餘丈歲月侵尋方憂日圯辛未壬申兩年淫雨爲虐疊罹河決之警黃流汎濫勢成懷襄其始至也值邑之印佐俱缺人情洶洶咸思竄避余首伐園樹爲橋斜園丁爲夫捐貲倡助危堤獲保無

恙及再至也水頭較前更高勢益烈南北二方
水與堤平衡射處舊址僅留尺許衆謂必不能
守余與邑侯詹公共坐堤上時已入夜呼燈火
呼匠役呼畚鍤唇焦舌敝加直覓夫沽酒犒勞
自昏達旦不敢寧處而南面水勢漸平次早由
東而北亦皆如是時苦無土每土一筐給錢五
文每夫一日夜給錢六十文闔邑負縵至工及
以酒食犒者絡繹不絕水勢旣定邑人士咸向
余相勞苦余曰未也河口未塞安保水不再至
倘水再至勢必無堤堤之不存城于何有逆料

至此真有寢不帖席食不下咽者矣是故堤之
當修不待智者而後知之也客曰子之議修堤
良是但歲方大祲經費何從處辦余曰無憂邑
雖小獨無縉紳之家乎獨無携貲而覓子母于
吾邑者乎屋宇鱗次有甘淪于洪波中而不思
出貲自衛者乎且歲祲而思拯之借此役也余
于是置募疏一扇門攤則例一扇房分上中下
三等輸銀有差會鉅野令井公攝邑篆余乘間
告其事公遂捐自理贖鍰銀八十七兩六錢又
申准東兗道陸公將發下賑荒銀三十八兩四

錢亦改充修堤之用未幾而邑侯王公至矣公具幹才居恒究心世務思以身任天下之重初至入傳舍余謁見卽首以堤訊余謂此議不可緩後余伺公少暇舉募疏及則例扇請裁于公公報可遂蠲吉三月初九日破土是日雨越十一日畚鍤興矣時堤外土未盡出余先將圍土用夫一百七十五名修樣堤九十二丈頂濶若干高若干示式也堤外非園卽宅基以余土先之餘可不費掣肘云爾嗣是土出淺廣別工可以並興鄉紳素封及商賈之家俱如約門雖

漸次輻輳卽貧不能輸者聽出力免銀時年大
荒民艱食余議每夫日給錢三十六於是貧民
蜂擁而來招募及門攤夫約用一千一百一十
五名擇委鄉民有材幹者分督七工並興辨色
而出日入而歸萬杵雲屯歡聲雷動民忘其勞
工極堅實茲故何也公之言曰不一勞者不永
逸何以勞之惟有鼓舞一法明示勸懲之公而
已其人役有拮据從事不曠時日者予有賞不
然者罰及之其督工有朝夕催促不憚勞瘁者
予有賞不然者罰及之公旣捐多金又頻犒賚

恩綦厚矣時歷各工叮嚀訓誡法綦嚴矣各夫役及督工鄉民感恩怵法竭蹶恐後宜也自三月十一日起至四月二十二日止僅四十餘日而工告竣根濶三丈五尺頂濶一丈五尺高一丈五尺方事之殷也竟西道謝公廵方適至聞舉此役欣然往閱與余步至工所勞來相勸又捐俸金三十兩工役益用鼓舞合之本役官師紳士商民各捐不等總計用銀一千三百零六兩而功成矣二十三日舉宴落成衆咸快之蓋不意斯工之速成若此也督工鄉民局幹勤儉

爭先趨事捕衙綜理周密始終罔懈余得藉其
力以完兩年堤工之局亦有不可沒者若乃破
土之時雨濡沾裳工興之後匝月晴霽又似天
心助順事機之難適遭者與

○嘉祥縣城本鉅野縣地金皇統中置縣初治山口
鎮正隆中遷于橫山之陽大定十五年遷今治始
築土城明成化三年知縣趙瑄重修周四里高一
丈五尺厚一丈東北跨萌山無隍池自城南轉而
西僅長里許五門東曰瞻魯西曰麟遊南曰南武
北曰鳳城復於儒學前開一門曰采芹崇正間東

堯兵備道陸夢龍檄修始砌以石十二年知縣李
昌年爲捍禦計與紳士高斗光等捐資修

國朝康熙十三年知縣徐之駿重修

兗州府志
泰縣志

○魚臺縣城舊治方與唐元和四年遷于黃臺土城
半圯于水元泰定間縣尹孫榮祖劃築西北一隅
周七里餘高二丈二尺厚一丈池濶三丈深二丈
接舊城廢址環以大小兩堤三門東曰迎岱西曰
達汴南曰橫河明萬歷三十二年河決南旺由豐
沛入境爲城郭患巡撫黃克繡督令增修重堤以
保障之

國朝乾隆二十一年河決城壞遷治於縣境之西用
董家店買民地七十九畝四分二十二年知縣馮
振鴻始建城用帑三萬九千一百有奇周四里一
分高二丈三尺五寸基濶二丈四尺頂濶一丈門
四東曰控鳧西曰映莎南曰鎮黃北曰通濟各有
月城建樓其上

護城隄周五里高七尺厚七尺乾隆二十七年知

縣馮振鴻捐築

通志參覈
州府志

直隸州志

卷七

三

外志

雜錄

直隸州志二十一

官署

州爲都水監之所駐節故公署特多于他郡而志必以州署爲先者志爲州作也雖故署而亦必志之者志所以道故也夫聽事有堂燕游有室賓寮有館豈徒出入委蛇而已哉易曰兼山艮君子以思不出其位蓋人臣夙夜從事之所進思盡忠退思補過于是乎在可不慎歟溫公諫院題名記吾得而借鑒焉

州治在西門內聽事正堂三間顏曰阜成康熙中知州吳樞所題也東西爲庫房堂下東爲吏戶禮

三房西爲兵刑工三房堂東爲承發司前夾于堂

塗者爲皂隸房中稍南爲戒石坊

本爲亭知州王孫蕃易以坊

儀門三間東爲寅賓館衙神土地祠西爲獄大門

三間前爲影壁阜成堂之後爲宅門門內二堂三

間又其後爲三堂顏曰崇禮知州胡德琳重建又

其後爲內宅門門內爲延慶樓知州藍應桂創建

崇禮堂東爲涵碧舫爲賓客燕會之地二堂之東

爲鴈白軒南爲皆春堂亦胡德琳所建也其軒今

爲漱芳書屋皆春堂之巽爲文昌閣藍應桂建

按舊志與今異宅門本在二堂之外今則在

宅門之內二堂之東有聽雨軒大堂之西有幕廳東有軍器庫今改作正堂之西爲河庫運河丞所管今歸州大門之左爲陰陽學右爲申明亭旌善亭東有歷科進士坊西有歷科貢舉坊明末燬

○吳樞重建大堂碑記濟寧州治廳事以康熙二十年燬于火葺蓬茨以視事官數易未之建也蓋濟爲南北要衝水陸交會之地人最雜事最繁號稱難治簿書期會奔走供應日不暇給官此土者不數年輒更去廳事之不得復建無怪

也顧念

國家承平日久所在山川形勝古帝王賢聖陵墓祠
宇暨登臨游觀之地皆奉

天子詔以次營建或加修理所以彰治化之隆昭太平
之象者備至此州廳事則

天子命吏以教養斯民之所也夫奉

天子命以來而處于蓬茨之下懸治象以來萬民之觀
母乃褻

國體而輕所事乎康熙三十二年秋余承乏來此顧
而愧焉然檢較一切公務所宜興釐改革損益

變通者甚多方汲汲竭心力以圖之未暇謀及
此也閱二載公務稍有成緒爰以薪米之餘爲
鳩工庀材計而州之紳士商民暨諸屬吏聞之
皆相率鼓舞願各隨其力以勦厥成乃擇于康
熙三十四年七月初二日經始落于十月十二
日凡庭楹棟礎不事雕飾不施綵績昭其儉也
旣成因顏之曰阜成堂不敢忘教養斯民之責
俾出入瞻視以自警且與州之人交相策勵也
而今而後多士登此堂則當思非公不至庶民
望此堂則當思農桑本務訟獄者則當思息事

省爭輸將者則當思急公親上庶于臯成之義
其有當乎堂之後爲穿堂舊亦燬重新之大門
左右垣衙神廟兩廊書吏房皆修治之穿堂西
復構數楹爲公退檢點案牘之處胥役白事者
亦于此不令數數入署所以慎樞機也堂成後
次第營構又二載乃苟完備云因筆而記之而
協貲與力暨董率之勞者皆書名碑陰以垂後
○徐績重修衙署碑記畧乾隆二十三年夏績奉
命來守濟寧先是雍正初先大父爲分守兗寧道駐節
濟寧而外大父趙公實爲州守今三十餘年績

又承乏於此溯仰風徽深愧非謏劣者所能繼
武且懼咎戾之積或至隕越以貽前人羞夙夜
兢兢不遑自逸居三年州人咸相與便安之於
是衙署歲久弗葺夏五月命工整其傾圯而易
其故材之朽壞者且加堊飾焉由是燕居之堂
肅賓之舍煥然一卽於新明年會

天子南巡狩於

行在召見蒙

恩以知府擢用則績又將候代以去不復能久居於此
矣自惟竊祿數載於事無一可書區區解宇之

間支頽補敝亦詎足以煩紀載惟念幼侍先大
父之旁丁寧訓勉屬望良至今濟寧卽公舊日
臨泣之邦得時時悚惕其精神而外大父爲守
於此前後十有八年諸所興爲具有條法至今
一一可遵以績之無能忝茲要劇幸無大戾且
邀

天子之寵恩得遷擢以去者寧敢忘其所自來乎乾隆
二十七年壬午春二月某日

○胡德琳崇禮堂記濟之爲州當舟車之會江淮
兩浙荆湖轉輸之咽喉故又爲河道總督之治

所文武冠蓋與首郡匹隄湖堰瀦枋牖之工其
役特煩而四方往來皇華旌節之送迎無虛日
南船北馬百貨萃聚人物殷富繁華之習浸淫
鄉里五方之民爰居爰處剛柔不一又卒伍之
士與齊民雜糅往往齟齬而不相諧其調劑斷
決惟于有土者是問余以菲材承乏方夙夜惴
惴以不克勝任爲慮奉檄之日進而請約束于
方伯尹公公曰州故劇邑號難治然子大夫以
敦厚崇禮爲先其殆庶乎記曰君子恭敬樽節
退讓以明禮蒞官行法之道言約而該且廣以

大矣推此類也爲國以禮何地之不可理何民之不可治乎余退而誌之不敢忘州之治于元爲路明初爲府視他邑較宏敞而宅內聽事之處所謂三堂者頗卑下因乘農隙培其基而崇之雖廣狹無加于初榱瓦一如其舊而爽塏則過乎昔矣經始十月某日以十二月某日訖工按三堂之名始見于唐虢州劉刺史其州宅臨水故有亭臺島嶼偕子弟飲酒賦詩其中今之三堂朝夕于焉敬事名同而實異非飲酒賦詩之所也因思方伯公語名之曰崇禮以寓日白

省且禮之一言非僅治濟者賴之卽凡有臨民之責者亦無不賴之不特愚魯當奉以周旋無敢失墜卽後之視事于斯者亦當守之而勿失也故旣以顏其堂復爲之記非第識始事訖工之歲月已也

○胡德琳觴白軒記崇禮堂之東南三十步有隙地焉己丑之冬堂旣落成明年三月春和又營退食之處于隙地且爲賓至燕飲之所相傳賀監曾爲任城令觴太白于酒樓故以觴白名之云按新舊書本傳未有爲任城令之據卽太白

之任城縣廳壁記但云賀公亦未嘗以爲賀季
真也然太白少時故僑寓于此父客曾爲任城
縣尉而又爲令作記則其主賓歡洽觴咏酬倡
也固無不可何必季真哉惟州向爲府任城寔
爲倚縣則州治非縣治也曹元用二賢祠記謂
舊縣治元時改爲驛舍今州治東北有馬廐而
軒正直其南則去當時之縣治當亦未遠且第
勿深考姑借以寓景慕之意云爾至太白記所
謂撥煩彌閑剖劇無滯余甚慚于賀公而賢豪
長者稅駕於此或以余爲可教而惠顧之豈無

有謫仙其人者乎明月高時臨風歌處未許此
翁千古每讀朱竹垞太白樓詞不能無望於
四方君子之惠我也

○藍應桂延慶樓記在官之舍宇蘇文忠云蓋有
所從受而傳之無窮非獨以自養也若歆仄腐
壤轉以相付不敢擅易一椽此何義焉觀文忠
之言官舍之不治自古而然濟州在元爲路明
初爲府統十二邑

國朝雍正中曾爲直隸州今又復其舊蓋地當水陸
之衝河帥軍門之所駐在山左最爲繁劇故建

置規模非他州比聞康熙中聽事堂圯者十年
官數易皆葺蓬茨以臨事錢唐潛竹吳公始重
興之夫公爾忘私古訓也以傳舍視聽事得謂
之公乎比者桂林書巢胡公會爲修整更建三
堂特高明爽塏所謂崇禮堂是也堂之東葺涵
碧觴以會賓客又於東南隙地建觴白軒與皆
春堂而更代之際僅存棟宇戶牖踈櫺毀敗無
餘余復修而葺之易觴白爲漱芳書屋又於其
巽隅建文昌閣焉由崇禮堂之西序循廊而南
折而西有齋焉曰有文亦胡公所創余更廣而

崇之又西南則射圃建亭曰志正由是向之敝
陋者無不改觀惟崇禮堂後燕寢之所棟朽榱
折猶前明之遺乃斥其舊而重構焉并架木爲
樓可以遠眺望與崇禮堂相稱也顏之曰延慶
云蓋自

翠華屢幸必有 慶典所謂

一人有慶兆民賴之者非乎臣子奉職宣勞所謂受王
嘉師咸中有慶者不當以自勉乎又本先人敝
廬之舊額今以顏此樓者私之己不若公之人
以傳之無窮繼此而至者尙其同我志而勿視

爲傳舍焉則與有慶矣乾隆四十二年夏四月
日藍某記

州同知署在州治東

管河州判署在州同知署南

吏目署在州治西

旌善亭

申明亭二亭舊並在州治門外之西

按旌善申明二亭皆明初所建凡有善惡皆
書名于中以示訓誡四鄉皆有之後惟在治
門者獨存康熙十二年修志時猶在不知廢

于何時又東西有兩坊東鑄歷科進士題名
西鑄歷科舉貢題名明末燬

河督部院軍門在州治東或曰元總管府舊治

明永樂九年工部尙書宋禮建宏治間尙書陳

某隆慶間都御史翁大立重修

兗州府舊志

總督河道部院衙門原係濟寧左衛署宣德二
年調衛臨清改置軍門正堂六楹後堂六楹扁
曰禹思堂後爲部院宅左爲帝咨樓曲周劉榮

嗣建

國朝三韓楊方興改爲雅歌樓

今名挽洗樓

又東爲後樂

圃李從心及楊方興皆有記

乾隆四十二年總河姚公立德改額

爲平治

山堂西爲射圃本屬儒學射圃康熙初廣寧

盧崇峻改入署內

舊志

翁大立隸書四思堂箴禹思天下有溺者由己

溺之稷思天下有饑者由己饑之伊尹思天下

之民匹夫匹婦有不被堯舜之澤者若己推而

內之溝中周公思兼三王以施四事其有不合

者仰而思之夜以繼日幸而得之坐以待旦

右刻

題名牌陰

在大堂左

中軍副將署在東門內大街

城守營都司署在北門內大街

城守營守備署在東門內

中營都司 左營叅將及守備 右營遊擊及

守備署皆賃民居

山東通省運河道署在州治東南

順治初設濟寧道駐濟寧州管南河設兗東道

駐壽張縣管北河設東兗分廵道駐沂州康熙

五年裁兗東道六年裁濟寧道設南北河都水

司分理河務九年復設濟寧道兼管南北河道

罷分司五十三年又裁東兗道歸併濟寧道改

街爲兗寧道雍正九年兼轄曹東二州改街曹
東河道兗州別設兗莒沂道十一年以曹州屬
兗沂道以東平州屬濟東道今專管通省河道

通志

按道署原係濟寧衛自添設道署以察院易
建康熙十一年副使岳登科重修乾隆四十
年春大堂災運河章輅重建重刻題名記

運河廳署在城西南隅

運河廳署隆慶三年建舊爲正學書院

全河備考

署係曾子書院後爲頤真宮卽正學書院今改

兗州府運河同知公署正堂四楹東爲花廳西
爲庫吏房後爲居宅西爲三檜堂老檜三株千
百年物撫寧翟凌雲建今廢後爲委蛇閣康熙
九年麻城王有容建結茅爲之鑿池疊山具體
而微頗稱幽雅東西爲書吏皂隸房儀門東爲
寅賓館西爲土地祠大門前牌坊撫寧翟凌雲
題曰三省蜀譚絲改曰司農重寄東西牌坊東
曰符分望國西曰餉轉神京舊志
王有容增修運河廳署兼樹題名碑記略余佐
郡此邦甫下車輒奉檄塞石香爐決口功成旋

署廳事之外廡所依棲因捐俸鳩工建堂六楹
顏曰三省以此地原祀宗聖也後建樓四楹顏
曰禹陰軒以余職在治水也堂前啟茅舍兩層
或以訓子或以憩客內外各設兩廡使僕隸各
有所依署前表以兩棹一曰裕國一曰宣儲欲
出入自警厥職也康熙九年仲秋穀旦立石

泉河通判署在運河同知署後乾隆三十八年通
判萬年胡增建任城山長秀水盛百二有記見運
河備覽

濟寧衛署在東門內本察院舊署

萬歷州志云五
所在城中四隅

臨清衛署在南門內順治初移駐

參省志

巡漕使院舊在南池今在草橋之東賃民居

沈廷芳南池使院作二首玉壺花下記青春不

道春來倚醉頻一片蒹葭兩行樹雙橋長憩獨

吟人

漕使例子夏秋還朝余察賑後復奉命勘閱秋禾故頻居使院

杜公祠額起榮光亭翼穹碑歲月長鳳翥鸞翔

相對峙

文孫墨寶繼

先皇

三月十三日廷芳迎鑾于桃源蒙賜唐臣杜甫

聖祖御書碑亭東西

翼起永鎮名區

建署

四三

撫按察院在東北隅改爲濟寧衛後又改爲察院

今廢

按通志仍爲衛署

明洪武七年知州趙文德建

兗州府舊志

布政司行臺在院西今改入總河署內

布政分司在州治左成化間知州吳元聰建

兗州

府舊志

按察司行臺在州東今廢

舊志下全

分守東兗道行臺今改爲中軍廳在軍門東左

兵備道廢署

署在州治東北隅本爲沂州兵備道建其後不

設隆慶二年尚書朱衡題設管副使都御史萬
恭題加兵備職銜于此駐節

兗州府舊志

治水行臺在城西今廢

明李如圭治水行臺記略我太宗文皇帝建都
幽燕資東南財賦以實京師永樂初由海而運
每歲不免漂溺繼廼修復元時會通河運然會
通河實賴山東諸泉源焉泉源散在各州縣舊
制每泉各置泉夫老人以供疏濬之役州縣委
官領之兗州府既設管泉同知矣而復設工部
主事一員專管督理蓋欲其泉之常達而爲漕

舟之利也百餘年來遵行罔失糧運大通回視
海運安危得失何啻天淵矣奈歷歲既久立法
本意多未講求故挑淺之功則密而濬泉之力
則疎以致有山東泉微之說近歲黃河決飛雲
橋決穀亭鎮衝溢運道反謂藉之以行舟其誤
甚矣邇者黃河南徙濟寧而下一帶牖河泥沙
淤澱舟不能行嘉靖乙未夏始用人力挑通然
泉源旣云微而河水則又徙河道雖復水安賴
焉時余致政家居仰荷聖恩起於山林之中授
以河道之責以丙申仲春至濟蒞事時河水淺

涸舟甚艱行衆爲余危之余曰不然山東輝
因泉源而開欲河有水當於泉源求之乃申飭
府州縣官員務以濬泉源導泉流爲事定限完
報余廼駕舟閱視濟寧湖水見其波光浩蕩卽
諭衆曰此水亦可以濟矣衆曰河高湖卑水將
安出余廼令管河官將湖水開渠引至河邊置
造桔槔之具掣水入河已而南旺安山等湖俱
施以此法隨又將各處淤塞溝渠皆爲疏導諸
停蓄之水咸得以入於河甫及兩月各處泉源
濬矣泉流導矣水且至矣漕舟之行畧無阻滯

而亦無事於挑撈之功桔槔之力矣仍令管河
官將各湖堤修築蓄洩以備旱潦因慮山東一
帶牐河常賴修治而修治之道器具爲先濟寧
舊無廠舍往歲遇有修治工完器具卽于所在
貯之漫無稽考且多損失况臨河亦無館署糧
船過濟殊乏督理之地余乃謀於管河郎中楊
君旦管贖員外郎邵君元吉管泉主事顧君狷
於城西臨河易地買材命匠督役中爲門堂以
便臨視督理堂之左右爲廠房以貯器具圍之
以垣墻華之以繪畫固之以鍵鑰守之以夫老

經始于夏五月落成于秋八月匾名之曰治水
行臺偉然爲漕河壯觀楊君輩謂余宜有言以
記之且余以治水爲任固不可以不文辭蓋嘗
思我國家漕河形勝誠天造地設而有所待者
夫自通州以至儀徵凡三千里而南旺分水適
當其中南由牐抵徐州則會黃河至淮安入海
而揚州湖水接之以達于江北由牐抵臨清則
會衛河至天津入海而通州白河接之以達于
京南北地里之遠近旣侔而水道之接濟亦類
雖圖畫亦不能盡其妙誠天下河道第一形勝

我聖明億萬載無疆之業也頃年以來因河道
多事專命大臣總理而黃河亦兼治焉蓋以黃
河利害與運河有相關耳余以菲謏濫叨斯寄
每思兩河修治大要不同竊謂治運河者須治
其源而河有體用源乃體也河其用也治黃河
者惟治其流而水有常變小者常也大其變也
治運河者濬泉導流不少懈怠則體立矣而又
挑淺修埽築堤治堤之類其用亦行河其少艱
乎近余具題議處漕河急務已蒙睿旨漕河全
賴泉水近來多致淤塞及被豪強侵占吏部便

推選素有才幹同知一員專一疏濬差去部官
務要用心督理不許虛應故事通行遵奉矣治
黃河者於水之常遇有沙泥淤塞則用人夫駕
船於水中以鉄扒竝尖鉄鉏濬之使沙泥隨水
而去夫淤塞旣除則水得其道自無衝決之患
更修築堤岸以禦水之變或護城池或防耕種
使民得遂其安養而免渰沒之虞則黃河之事
可少濟矣今黃河三委一由蘭陽大名山東至
蕭縣出徐州一由寧陵夏邑宿州出宿遷一由
亳州合渦河會淮水出清河三委俱當疏濬通

流以殺水勢第人多狃於俗見惟以瀰漫之勢
爲言謂黃河爲神水不可治要在斷然行之耳
近余具題議處黃河大計亦荷俞允依擬施行
矣若夫今日徐呂二洪則在用黃河之水由蕭
縣出者經小浮橋與睢河泉水合流其濟焉是
皆於其要處致力如此顧余以一得之見因事
制宜輒乃自信抑嘗試之若有驗然且以職務
所關不敢隱默因并兩河於此發之以備高識
遠覽之君子採焉至於修建之詳不多及謹記
時嘉靖十五年丙申冬十月朔日立石

工部分司署今為普濟堂康熙末曾改書院

訪叅探

濟寧分司

在州南門外東向成化五年主事畢瑜始正南向隆慶三年主事筮東光

重修為門為儀門儀門外直宿房中為兼濟堂堂

東為書辦房文卷房

俱成化五年建

後為飲冰堂堂東

西為書房後為寢樓樓前為東西廂

俱正德三年主事童

器建十年主事東魯重修

西偏為蓮池池北為草元亭

隆慶元年

主事張克文建胡瓚改今名

堂之前為抱廈

萬歷二十六年主事胡瓚建

東西為皂隸房又西為外廚房為書吏廨對峙

而東為君子軒宏治六年主事蔡鍊建前有蓮

竹故名十七年主事林煥重修軒後為半齋萬

歷二十一年主事韓范改置二間後胡瓚題爲
吏隱又其後爲一卷亭嘉靖二十年主事楊撫
建君子軒之前爲客廳對峙而西爲土神祠萬
歷二十五年胡瓚建門外繚以周垣萬歷二十
七年主事胡瓚建左爲舟楫右爲霖雨東西爲
官吏房爲聽差房爲鐘鼓樓嘉靖三年主事楊
撫建前爲轉漕要會坊東西爲節宣國脈飛輓
京儲坊萬歷二十四年主事陸化淳重建又東
爲國賦通津坊西北爲司空行署坊循河之涯
南爲排泗坊主事胡瓚匾額舊爲濟川萬歷二

十四年巡鹽御史畢三才重修北爲瀾濟坊隆

慶六年主事張克文匾舊爲錦衣四衢皆土渚

不可行其後迤西始易以石云

泉河史

分司衙門前牌坊匾曰都水行臺砥柱中流

舊志

任城縣故署今州治

方輿紀要

按李謙撰冀侯去思頌云朝命設江淮漕運

司以州廨爲治所侯以公署所以布政僑寓

民居可暫不可久乃卽任城故署立州廨蓋

至元十二年廢任城縣冀侯建州廨在二十

一年至二十三年復置任城縣又不知署在

何處

漕運司之故州治
悉卽今河院署

李白任城縣令廳壁記風姓之後國爲任城蓋
秦之古縣也在禹貢則南徐之分當成周乃東
魯之邦自伯禽至於頃公三十四代遭楚蕩滅
國屬楚焉炎漢之後更爲郡縣隋開皇三年廢
高平郡移任城於舊居邑雖屢遷井則不改魯
境七百里郡有一十三縣任城當其要衝東經
瑯邪西控鉅野北走厥國南馳互鄉青帝太昊
之遺墟白衣尚書之舊里也土俗古遠風流清
高賢良間生掩映天下地博厚川疎明漢則名

王分茅魏則天人列土所以代變豪侈家傳文章君子以才雄自高小人則鄙樸難理況其城池爽塏邑屋豐潤香閣倚日凌丹青而欲飛石橋橫波驚彩虹而不去其雄麗块圯有如此焉故萬商往來四方綿歷實泉貨之橐籥爲英髦之咽喉故資大賢以主東道製我美錦不易其人今鄉二十六戶一萬三千三百一十七帝擇明德以賀公宰之公溫恭克修儼碩有立季野備四時之氣士元非百里之才撥煩彌閑剖劇無滯鎬百發克破於楊葉刀一鼓必合於桑林

寬猛相須韋弦適中一之歲肅而教之二之歲
惠而安之三之歲富而樂之然後青衿向訓黃
髮履禮耒耜就役農無遊手之夫機杼和鳴織
罕嚙哦之女物不知化陶然自春權豪鋤縱暴
之心黠吏返淳和之性行者讓於道路任者併
於重輕扶老携幼尊尊親親千數百年再復魯
道非神明博達孰能與此乎白探竒東蒙竊聽
輿誦輒記於壁垂之將來俾後賢之操刀知賀

公之紀蹟者也

通志載此文謬改
賀公爲賀知章

按唐任城縣城在今州城稍南則唐任城縣

署亦非元任城縣署也姑附於此

器皿厰新司在城西南草橋嘉靖間都御史盛朝

選建今廢

克州府舊志

按盛朝選恐是洪朝選之誤省志有盛時選

乃隆慶時巡按亦非都御史也

南城驛丞署在南門內

通志

稅課大使局在南門外稅務街今廢

舊志下同

巡檢司署在魯橋今廢

僧正司在普照寺東爲清暑館明末爲中營中軍

署今廢

道正司在城隍廟西今廢

在頤真宮

兗州府舊志

醫學在南門外運河北岸

舊志

在州治東

兗州府舊志

陰陽學在州治東

全上

按今在州治西北

預備常平倉在官學西廡十四座共六十二間財

神閣及官廳大門各一間

採訪全下

蓮亭預備常平倉在南門外之東廡十六座共九十六間內六座知州藍應桂建

右二倉共貯常平并社穀共十二萬八千石原額有穀五萬七千二百餘運河道管理雍正十

三年改歸州

文案

社倉舊在四鄉今并入常平倉

社倉穀一千三百七十四石五斗二升麥一百十四石一斗七升

水次兌漕倉在城東南關外厰七座共二十三間財神廟及官廳茶房大門各一間

永豐倉在普照寺東各處所輸運丁行糧貯焉今廢其地賃爲民居凡五十三戶歲收租銀五兩三

錢七釐

吳璽曰積貯國之本計民之命脉也濟之常平
預備倉旣廢在官無顆粒之積至康熙二十九
年始開常平倉捐納事例又奉每畝捐穀三合
之行于是始有積穀歷年增益除已動支賑濟
外見存穀二萬三千五百一十一石有奇亦不
爲少矣余旣設法建造倉廩收藏有所但陳陳
相因積久不動恐有蒸變朽腐之虞按漢耿壽
昌倡立常平倉法春夏借與農民秋冬加息還
倉旣以濟民之急又可歲增積貯宋朱子

社倉法乾道四年崇安歲荒民饑朱子請于府
得米六百石賑貸夏受粟于倉冬則加息以償
歛蠲其息之半大饑盡蠲之凡十四年以米六
百石還府見儲米三千一百石以爲社倉不復
收息故雖遇歉歲民不缺血詔下社倉法于諸
路夫常平之法以借貸濟民之急以加息裕國
之儲而社倉之法則一借一還不復加息全主
利民矣然推陳出新均惟借之一法今春借秋
還之例卽古之成法但一經請詳允借則百姓
紛紛而來其間有奸徒冒借者有鬼名混借者

有非貧民而借以販賣者有代借而中飽者有鄉約地方包借而侵漁扣剋者有蠹役侵欺而假捏借領者有數人同借而一人暗領者有保人分肥者有經管之人需索者有爲債主逼迫而借以還賑者有無賴之徒借而花費者有劣衿把持多借者有貧生數數求借者一有不察卽不能免此諸弊後曰必不能依期如數還倉縱使借穀者皆係真正貧民往往借日容易還時艱難秋成之後斷無如期而至者勢必至差役拘比多一番催科紛擾萬一收成歉薄便

不可收拾故借出之日在民雖沾緩急周恤之恩責償之日在官便有拖欠虧空之累居今之時行古之法誠亦有難言者宋時旣下朱子社倉法于諸路未聞有行之得法如朱子者余豈敢謂古法之不善第恐泥古而不知變通未必有利于民生有濟于國計也陸象山曾云社倉固爲農之利然年常豐田常熟則其利可久苟非常熟之田一遇歲歉來歲秧時缺本乃無以賑之莫如兼制平糶一倉豐時糶之使無價賤傷農之患缺時糶之以摧富民封廩騰價之計

析所糴爲二每存其一以備歉歲代社倉之匱
實爲長便也又李惲謂魏文侯曰善平糴者必
謹觀歲有上中下熟上熟其收自四餘四百石
中熟自三餘三百石下熟自一餘百石小饑則
收百石中饑七十石大饑三十石故上熟則上
糴三而舍一中熟則糴二下熟則糴一使民適
足價平則止小饑則發小熟之所斂中饑則發
中熟之所斂大饑則發大熟之所斂而糴故雖
遭饑饉水旱糴不貴而民不散取有餘而補不
足也行之魏國國以富强論者謂此卽常平社

倉之祖象山之說亦本于此然則常平社倉原
自有糶之一法不獨借也李惺所云則歛而後
糶象山所云則糶而後糶今積貯如許不煩歛
無庸糶矣每歲青黃不接之時米價大概騰貴
貧民必多艱食余謂將見儲穀三分之一平價
出糶禁止販賣居積及有餘之家冒糶等弊一
時出糶穀七八千石則穀價斷無有不平者
彼大戶封藏待價之米穀知無湧貴之望亦必
盡數而賣價將更賤貧民一斗之價且可糶穀
二斗與暫時借給收成責還者其受益多也收

存穀價秋冬仍糴穀入倉如有盈餘以備賑濟
及公用之需旣無借時之弊又無還時之擾并
無虧欠之累况糴一存二卽遇荒年亦有備無
患而穀價未始不可放賑也一糴一糴周而復
始穀無三年之陳又何蒸變朽腐之足慮乎實
于國計生民兩有裨益計無便于此者但積穀
皆屬報部之項非經題請允行則有司者顆粒
不敢動也或謂倉穀久存無用應照大中小縣
酌量存留餘俱變賣存庫遇有凶荒賑濟則于
隣近所在糴買夫水旱之灾所被者必非一州

一縣凶荒之歲穀價必貴未有此地穀價昂貴而隣近之穀價平而且賤者且彼此均欲買穀此往彼買彼亦來此買卽無過糴之令亦無可買之理此必不得之數必不可行之事也特以積穀數多收藏不易看守維艱懼有耗折浥爛致干賠償之例故建此議所以自爲則得矣所以爲國計民生則非余所知也

牧濟錄

濟寧舊倉自明季廢於兵火其基址輒許民間租造房屋歷年所捐穀石皆散寄廟宇康熙三十年前撫佛公知各屬多無倉廩捐銀建造濟

寧分得銀二百三兩一錢二分前任領貯于庫以經費不足未行建造余於三十二年到任始鳩工庀材諭居民撤去其屋酬其費清出舊址造倉十大間共用銀二百八十二兩余實捐銀七十八兩三十四年又勉力捐造十大間並官廳一間計二百六十六兩三十五年有入官無礙之銀二百三十兩一錢具詳復造東西兩廡十二間余實捐銀一百五十一兩五錢共費二百八十四兩六錢三十九年復建南廡并大門七間計一百四十四兩七錢此係新納例監及

牙行經紀急公捐辦於是有倉三十八間各廟
宇所貯之穀始得全運入倉蓋歷八年而始完

云牧濟錄

馬廠在普照寺東舊志圖

按有馬廠自當有太僕寺行署蓋明末已廢
志故失之

小飯置在雲路坊東鵝鴨置南門橋下今廢舊志下全

冰窖一在稅課局南屬州一在小南門西屬衛今
無

養濟院在西門外草橋北

養濟院大門一間房三十二間

兗州府志

李順昌重修養濟院勸輸文嘗聞帝德如天憂
深昏墊王仁逮下哀切煢獨蓋以無告之民含
髮戴齒形異情同仁人君子軫恤之所必先也
今本州孤貧七十二名口疾病連年幾作黎邱
之鬼饑寒併日行爲蒿里之魂不佞受事以來
觸目顛連實深隱痛但欲炊無米勉爲巧婦而
未能司牧乏芻徒有曠官之可誚深幸上臺蠲
金發粟起白骨而肉之不佞捐俸授餐媿鑿隧
而灌矣暫能餬口終苦露居或時而鑠石流金

菜色何堪暑雨或時而裂膚墮指鶉衣難勝風
霜業已泣訴繡衣批行鼎建查得西門外舊養
濟院一區基址尚存羣材俱燬官帑如掃重修
未敢輕言民骨已枯如派安能出口所念此輩
誕生珂里有如燕傍廈飛待斃蓬郊不啻蟻瞻
橋渡爲此齋心虔告沐手摘詞敬啟仁德鄉老
先生及好義長者思野蕪附木而榮遊魚蔭瓦
而息各捐桂林之杪共成覆簣之山在號寒啼
饑之氓旣同聲而訟義卽挑脚刺船之漢亦撫
心而佩慈陰德難名陽功甚著較之琳壇梵宇

緇舍真宮所得不更多哉

普濟育嬰二堂在打繩巷南卽舊工部分司署也
雍正十三年河東總督王士俊檄建紳士公捐上
地四頃五十四畝又白金三千兩存典舖生息有
條約十則刊于木榜今榜藏河院署

採訪

普濟堂在南城五舖大門二門三門各一間廳

三間樓上下十間房四十間

兗州府志

兗州府濟寧州奉各憲文開遵奉河東總督部

院王 檄飭建造普濟育嬰二堂詳准條約十

則開列于後

以下木榜文

一窮民入堂居住必需分別覈實不宜冒濫也
窮民之內或筋力未衰或有親戚可倚或始則
孤幼繼而長成如此之類猶可餬口未便概行
仰食必確查果係鰥寡孤獨朝不謀夕實難存
活者方准入堂居住至若行乞奸徒此卽所謂
敗羣之輩亟宜驅逐

一窮民男婦不一當分居以別內外也窮民雖
係困苦然皆仰給于官衣食無缺若不早爲區
別則羣居聚處或至踰閑蕩檢故令男婦各居
單身男子三人共房一間單身婦女亦復如是

所謂各從其類夫婦全者一戶同居一室俾得
仍然完聚男子在前一層房屋居住婦女在第
二層房屋居住中間隔以墻垣務使內外嚴肅
不得混雜往來

一窮民口糧衣食之類宜每名按時酌給也查
窮民實在到堂者男婦共六十五戶又臨清衛
移撥堂內二名每名大口給米七合小口減半
每名每月給予鹽菜柴薪共大制錢一百文至
於衣服無論大小口每名夏給單布褂褲各一
件冬給棉布袄褲各一件兩年一換又每三名

共住房一間草鋪一大床蓆二領小鍋一口水
罐一個磁碗三隻竹箸三雙俾衣食棲息均無
缺乏

一羸老殘疾窮民宜令人代爲炊爨也蓋窮民
而至殘疾則時時臥床伏枕扶掖難行此等之
人旣無執爨之力又乏親屬使令之便若非計
口授餐必至仍然餓殍故每日需照人口米數
代炊給食則殘廢均霑而無向隅之泣也

一窮民疾病死亡宜設立醫藥給予埋葬也窮
民之內疾病固所時有死亡亦所不免凡遇患

病窮民隨撥醫生用葯治痊設或不起給以棺木領埋查堂近城闌人烟輳集之地其葯料棺木臨時自可措辦惟醫生一名需在堂伺候並無內顧之憂且有葯餌之費每月應酌給醫生口糧葯本銀二兩俾無枵腹賠累之虞再有異鄉孤苦患病者另有房屋三間令其在內調治給予葯餌糜粥俟其病愈回籍歿則棺木掩埋其葯餌等費亦在堂內支用

一堂內樓房上下兩廂庫房廚竈以及器皿之類宜逐一酌定也內樓五間上貯米穀可免漸

濕之虞內樓之下中厰三間以作公所正懸憲
制匾額兩邊各隔一間以爲存貯零星銀錢什
物之所東廂房五間許令辦事人在內住宿西
廂房五間作爐竈廚房并貯煤炭雜用家伙等
項再廚房內木桌二張木櫈四條大鍋二口中
鍋二口小鍋二口水缸四隻水桶二隻磁碗四
十個竹箸四十雙至鏟杓匏盆之類則隨時陸
續買置可也

一堂內管理執事人役宜酌量派撥也窮民衆
多事又煩瑣必需有董理之人又有執事代勞

之役方能諸事就理庶不至于冗費應于紳士
內選擇老成殷寔好善者二人掌管三年若有
勞績卽詳請給匾獎勵或延爲鄉飲賓介再覓
代炊之人二名兼司門戶給與工食又擇衙役
中老誠謹厚者使之專司出入火燭門戶之類
地方官不時查察或委佐雜巡防勿使冗雜滋
弊

一堂內錢糧米穀宜年終造冊核送并入交代
勿致侵漁虛耗也查紳衿人等捐助腴地四百
五十四畝計每歲有收之年除完納錢糧漕米

正供之外約所入籽粒共一百五十餘石又其
捐銀三千兩交與典舖生息按月二分算每年
該息銀七百二十兩除用之外尚有盈餘仍陸
續置買地畝示垂不朽以上籽粒銀錢凡堂內
經收支放以及動支應用必須開造四柱清冊
年終送府轉呈查驗再請歸入交盤冊內一併
交代則錢糧永遠實在而無侵耗之弊矣

一收育嬰孩事宜當豫爲酌量也凡收養遺棄
嬰孩卽需乳哺故以乳母爲首務查民間僱乳
立約必言定三年價銀十兩管其衣食蓋嬰孩

于三年之後自能飲食毋庸乳母故也今堂內僱覓亦應悉照民間價值每月給予食米三斗至嬰孩初時襁褓衣服稍長一體酌給口糧以及疹痘疾病所需葯餌均于堂內支給但育嬰堂設立城市凡深村偏僻之所或因路遠苦無人力抱送或畏人含羞仍行暗中遺棄均未可定應再設留嬰龕二座如式置造木龕中填棉絮不致風寒之患懸空高掛毋爲禽獸所傷又需聽其自置龕內不必另設人役看守惟着看堂人等子每日清晨看視有卽送堂乳哺至往

來行路之人或見遺棄道傍嬰兒但能抱送到

堂者官給賞銀三錢

按給賞太重恐有竊取之弊

一民間願領堂內嬰孩撫爲子息者應聽從民
便仍取具甘結存案也凡有遺棄嬰孩因念其
無人鞠育故令代養原非終身可以養給除民
間無子之家門戶單寒願領堂內男孩撫爲養
子或領女孩爲女爲婦均聽民便但奸良莫別
或有假冒無子情願領請而實則希圖畧賣取
財者亦未可定故必取具地隣切實甘結當官
立案則奸徒畏法而嬰孩終身有托矣

以上十條遵照憲飭刊刻永遠遵行須至榜者

雍正十三年閏月某日榜

育嬰堂在西門外武勝街乾隆四十一年河道總

督姚公立德運河兵備道章公輅建

同仁公所在北門內大關帝廟東乾隆四十五年

公建知州王道亨依蘇州錫類堂施棺之例酌定

條規因亦顏其堂曰錫類任其營度之勞者秀水

張春臺陽和也

採訪

錫類堂知單同仁公所募化施棺已蒙各施主
慨發慈祥捐金建造所有施棺經費必須酌定

章程以期永久今將每愿捐施錢數及支錢憑
據開列于後 一大棺一具每愿制錢五文小
棺一具每愿一文 凡施棺公所各設支票照
發二月吉旦闔郡官紳士庶公具

城二以古計開城其地極其

前一其後一其地極其

城二以古計開城其地極其

城二以古計開城其地極其

金鄉縣

縣署在城內正北大門三間上爲譙樓門外照壁
東爲旌善亭西爲申明亭門內儀門東西角門門
外東爲土地祠爲寅賓館爲壯班房爲收糧房西
爲快班房爲巡更房爲收糧房爲監獄儀門內直
北爲大堂五間前爲露臺臺上置日晷石嘉量石
臺前甬道戒石坊堂東爲庫樓西爲戶總房東爲
吏房禮房十間西爲兵刑工房十三間堂下東西
皂班房堂後爲宅門內爲二堂五間東爲細香廬
爲書房六間西爲芳潤居大堂東爲官宅宅門前

爲三堂五間堂東爲書房三間堂後爲內宅正房
五間東廂房二間西廂房三間西後凝綠軒軒後
爲岸舫三間後爲羣房三堂南有馬廐中祀馬神
由儀門左出入

竟州府志下全

舊志載署自宋乾祐二年知縣王宣美建明洪
武元年縣丞李瑾重修正統十一年知縣沈義
增建天順四年知縣龍駿改建大堂二堂隆慶
三年知縣崔元吉重修

國朝乾隆三十二年知縣王天秀重修

四端堂乾隆三十二年有麥秀兩岐禾垂雙穗

其盈丈棉開八房之瑞知縣王天秀以顏其堂

瑞記

儒學教諭署在學宮街西大門一間二門一間大堂三間書房四間後爲內宅正房三間東西廂房四間訓導署久廢賃居民房

典史署在縣署西南

駐防署曹州營汛在縣治南大街東正房三間康熙年知縣沈淵建演武場在南門外迤東

陰陽學在縣署東醫學在縣署西

常平倉在縣治東房十五間額貯穀二萬一千石

社倉舊在城四處在鄉十處社長經管乾隆三十二年奉文知縣經管現存穀一千四百五十二石並貯常平倉

養濟院在縣治東南房二十三間

普濟堂在西關知縣楊恕建士民公捐置房十八間地七頃三十七畝知縣麥子淳置地十五畝

育嬰堂在西關雍正十二年邑紳張元善創捐房二十間地四頃二十七畝

○嘉祥縣

縣署在城內東北萌山之麓大門三間儀門左右

角門門外東爲土地祠西爲監獄房九間周垣大堂三間東爲庫房一間堂下東爲吏戶禮房西爲兵刑工房堂後爲二堂三間東西廂房又西爲書房三間又東爲三堂三間東南爲內宅南向正房三間東西廂房後爲廚房四間以南羣房三間舊署頗湫隘明洪武四年署縣事主簿王禮始加修葺天順七年知縣張慶重修增建

國朝順治五年寇燬康熙十年知縣徐之俊重修創

建規制始備

兗州府志

儒學教諭訓導署舊在明倫堂前久廢賃居民房

典史署舊在縣署儀門內東南久廢賃居民房

駐防署充鎮左營汛演武場在西門外

陰陽學醫學俱在縣治西街僧會司在東郭大雲

寺道會司在城隍廟

常平倉在縣署迤東房四十三間額貯穀一萬四
千石

社倉在縣署迤東房六間乾隆三十二年建現存
穀三千三百三十一石

養濟院在西門內房七間

普濟堂在縣署西房三十三間瞻養貧民三十餘

○魚臺縣

縣署在北門東大門三間門外照壁門內儀門傍置夾門門外東爲土地祠爲馬號門內大堂五間前有抱厦甬道上建戒石坊堂東爲吏戶禮房西爲兵刑工房承發房堂迤東爲書房兩院各六間宅門門內二堂三間東西廂房各三間官庫在大堂東夾室內庫在二堂東有上宿房內宅正房五間東西廂房各三間廚房六間乾隆二十四年新

建知縣馮振鴻承修

兗州府志

河渠直隸州志 卷十
儒學教諭署在明倫堂東

訓導署在明倫堂西

管河主簿署在南陽鎮

興史署在縣署西

南陽牐官署在南陽

駐防署沙溝營汛在北門內房二十四間演武場
在北門外

南陽行署順治十四年河院朱之錫建

常平倉在縣署東廡口八座倉房五十間額貯穀
四萬一千石倉不敷用每分貯南陽穀亭等處以

近水次易于撥運

社倉貯穀一千九百一十五石乾隆三十二年歸

縣管理

養濟院在東門內房五間

普濟堂在東門內房二十四間

育嬰堂在東門內房六間

河橋水驛丞署在南陽鎮今廢

濟寧直隸州志卷八

建置二

學校

古者王宮國都以及閭巷莫不有學然先聖先師釋奠無一定之位唐開元以後郡邑通有孔子廟祀而廟與學亦未合爲一也宋初凡州邑皆有孔子廟士不滿一百人者猶不得立學至慶歷以後學乃稍稍遍於天下自明以來然後一州一邑無不廟祀孔子無不立學且鄉里又有社學彷彿黨庠里塾之遺意噫亦盛矣今次

自大成殿以及崇聖名宦鄉賢所謂廟也明倫堂學舍尊經閣以及學官署所謂學也而社學及書院附焉

大成殿

至聖先師 四配 十二哲皆塋像

廟中從祀像始元皇慶元年明永嘉相張璉題易木主兩廡賢像盡撤惟先師像生員王鑑以死護守他學宮皆木主濟甯像獨存

舊志

兩廡各十六室 先賢 先儒皆木主

國朝康熙五十一年升宋儒朱子爲先賢列十哲之

次乾隆三年又升祀有子皆木主四十二年知
州藍應桂補瘠二像

大成殿前古槐一株千餘年物也一幹平引自
西北而東南長數丈許天矯之勢宛若游龍下
有古井亦不知其所始後因歲久朔望瞻拜懼
爲所壓截去數枝頓失舊觀

舊志

明陳魯濟庠異槐詩盤旋根節不凡材長向芹
宮卧講臺翠葉巧當紗帳護黃花平對錦綳開
纔如屈蠖隨風舞忽似蟠龍帶雨回千載清華
垂蔭遠三株却笑尙塵埃

禮器庫在大成殿東樂器庫在大成殿西

按殿廡及庫乾隆十三年里人李廷銓修四十二年知州藍應桂大修

戟門三楹

齋宿所三楹在戟門左知州藍應桂扁曰致誠省牲所三楹在戟門右

泮池在櫺星門內

聞舊在影壁外

乾隆四十二年春知州

藍應桂重濬有泉湧出立石泉上題曰聖泉舊有橋康熙中州人上虞令潘兆元重建今無

○盛百二聖泉記聖泉者濟州泮池所出之泉也

濟州城三面繞府河河爲泗之別流東來絕沆而西注於馬場湖水經注沆水者洙水也沆洙相入得通稱矣則濟州之泉要皆洙泗之脉而又出於泮宮故曰聖泉也水經注巫縣東北三百步有聖泉謂之孔子泉義無所取不如名此之切也泮池之泉未之前聞曷始乎始乎

今上龍飛之四十二年仲夏也曷爲而始也蓋泮宮之不修幾百年矣顏垣斷橋上雨旁風有兔葵燕麥之嘆刺史薌墀藍使君下車之始卽謀所以新之乃任鉅費艱鳩工庀材非旦夕可辦州又

南北水陸之要津往來賓客青雀銅烏銜尾上
下冰泮以後無時無之郊迎致館饗餼芻茭日
不暇給守茲土者又類不滿三歲則遷未暇及
此使君蒞茲五載漸摩之久人服其教吏從其
令州故屬兗郡昨歲丙申始直隸於布政司領
三縣事事與民更始遂謀於鄉之士大夫使君
先捐俸爲倡自

大成殿以及櫺星門之外輪奐改觀金碧輝映於
是泮池之瓦礫榛莽亦治而去之有泉涓涓出
焉凡三四穴清冽以甘權之重於他水十之二

於是州之老幼聚觀以爲人文蔚起之兆皆使
君振興學校所由致不特百年之耳目一新而
醴泉之出於泮宮尤自古未有也嘗考濟寧之
泉見於圖經者凡四惟太白泚筆泉最知名今
茲泉出則泚筆不能專美矣抑更有異池西枯
槐輪囷枝禿不知幾何年忽條肄穎發扶蘓纒
紛蔚爲美蔭豈除舊更新草木亦效其靈耶夫
天與人常相須興舉廢墜人也泉自無而有木
已枯而茂天也天人之理寧謂無憑我

國家

聖聖相承邁越往古不屑言祥瑞然感應之理莫知其然
使君謙讓不德以爲是節督臺省雅化之休徵
更推本於

聖天子壽考作人之瑞應屬余爲記附之志乘以告來
者若夫歌咏盛事應宮諧商尙有望於大雅君
子焉

江陰夏敬秀聖泉頌其體淵淵靈泉伏渟脉發
惟人時出由聖百年

聖化淪浹心性百里 聖居洙泗流併毓秀任城頻宮
瑞應如醴斯醇如玉斯瑩旁有枯槐條榮葉並

被此涓涓芹藻交映閑者忽開悴者忽盛邦家
之光人文之慶濟濟從公來遊載詠濬之疏之
清溶視聽有本不涸惟虛無競復其見心蒙以
養正聖人立極曰惟主靜希聖淵源統於克敬
止水湛如太極涵孕齋沐日新澄心此鏡

張淑渠詩二首泮水鳩工後枯槐秀發初祥爲

使君慶春滿 聖人居根傍醴泉潤枝連壇杏

舒花黃催就試早晚報賢書

咏枯槐

仙槐掩映處快靚醴泉初靈液流仁澤文瀾溢

聖居源通洙泗遠香泛藻芹舒應倩如椽筆

嘉祥次第書

咏聖泉

潘呈念聖泉詩廟貌丹青舊弦歌禮樂新源應
通學海水可藉明禋映月心如印涵雲鑑倍真
塵纓那敢濯幸得溯芳津

盛世輕祥瑞休徵理固然何人培道脉茲日吐
靈泉芹藻珠光合橋門壁彩聯更憐泮池上枯
樹接新煙

櫺星門三

東西二坊東曰學聖學西曰育賢才康熙二年郡
人陳展編十九年總河靳輔屢修乾隆四十二年

知州藍應桂修

照壁一座左右欄門各一

泮宮化成坊亦名雲路坊前臨大街康熙間郡人鄭與僑重修久圯

崇聖祠舊在敬一亭後明嘉靖戊戌總河于湛重修莆田王俊記乾隆丁酉知州藍應桂改移敬一亭故址

崇聖祠舊曰啓聖明嘉靖九年建祀叔梁公以先賢顏無繇曾點孔鯉孟孫激配享先儒周輔成程珦朱松蔡元定從祀

國朝雍正元年

詔封

先師五代王爵 肇聖王木金父 裕聖王祈父

貽聖王防叔 昌聖王伯夏 啓聖王叔梁

紇改今稱增張迪從祀

舊志參充
州府志

名宦祠在崇聖祠左知州藍應桂重建

明初與
賢祠皆在

學西後始移於崇聖
祠左右在今稍北

祀漢任城令袁安任城長周磐任城相楊秉

城相劉儒任城令劉祐南朝宋任城令羊規

北魏濟州刺史段榮高季式任城公奚牧北周

任國公于翼唐秘書監賀知章濟州

卿五代周濟州刺史任漢權宋知濟州姚鉉通
判濟州陳堯咨王曾知濟州謝文瓘忠翊使楊
存中濟州團練推官畢士安任城主簿劉顏元
三州總管石天祿濟寧路總管胡祇遒答里麻
董搏霄單州判官蓋苗濟州達魯花赤冀德方
知州李綱判官畢國輔明濟寧知府段約方克
勤知州蔣資傳霖濟寧衛指揮狄崇州同知潘
時正時一作叔知州史誠祖祝祥州判葛興州訓導
和承芳工部主事分司侯一元任城衛指揮鮑
東萊工部主事泉牐分司胡瓚兗州府知府程

學博運河同知劉芳譽知州唐世柱總河張國維河道葉重華濟寧衛指揮張世臣

國朝總河楊方興三省總河朱之錫李蔭祖濟寧河道方兆及濟寧道張伯行兗寧道余甸巡撫山東都察院李鈞楊廷耀布政使王用霖侯居廣按察使吳毓珍兗東道潘超糧道朱廷楨濟寧道韓鎬宋廣業學道徐綱學政趙申季臨清府守備李承恩知州李順昌徐士訥吳樞

按名宦鄉賢皆據通志萬歷志文冊及傳本主叅定蓋苗以有功於濟祀之宜矣

以前之濟州刺史與此無涉賀知章亦未爲
任城令然有其舉之莫敢廢也惟隋之虞慶
則斷不可入見封建

鄉賢祠在崇聖祠右知州藍應桂重建

祀漢上黨太守魏應白衣尙書鄭均諫議大夫
何休魏徐州刺史呂虔陳郡太守孫該晉尙書
左僕射魏舒荊州刺史魏詠之宋知石州翟守
素秘書監榮諲尙書左丞李邴元鎮江總管段
廷珪明都察院楊浩刑科給事中王鎮曲沃訓
導曾壽右副都御史劉澤寧國守鄭文炳商邱

訓導袁墨西華令張龍交河令崔雲鶴吏部侍郎靳學顏副使靳學會六合令董潤貴州布政使于錦大名守鄭真聞喜令仙豸大理寺卿王湘魏縣教諭楊士基陝西布政司叅政郭汝郊縣令扈魁朔州知州臧石山海衛教授潘蟾獲鹿教諭臧惟允太原府通判寇來賀淮安同知姜桂芳應天府尹李堯民鶴慶守李燦陝西巡撫于若瀛東光令周一龍河南布政司叅政楊洵洛川令呂正音太常寺卿陳伯友荊州府司判潘士謙虹縣訓導邵鳴秋霸州道副使張

采知蒲州張文乙行人司靳于統文縣令楊鳳

振左春坊諭德楊士聰內閣中書姜遇武陽曲

令任孔當瑞州推官趙洙清戶部員外陳展誦

國朝山西道御史邵士標建南道王道新攸縣令王

宏工部侍郎王天眷雲南道御史黃敬璣四川

太平令任孔昭江南鹽驛道楊宗震戶部主事

陳益修翰林侍讀學士潘應賓

明西安守楊鳳翥補入楊鳳振下

明洪武四年詔天下學校各建先賢祠左祀賢

牧守令右祀鄉賢

通志

忠義祠在名宦祠南知州藍應桂建

祀金翰林應奉李演明簽江南行樞密院事趙

德勝刑部主事鄭瑄楊州守任民育兵部尙書

徐標鄧州知州楊佩深州知州李燭武城訓導

汪應科武昌通判湯三俊安慶左都督楊振宗

安東遊擊阮應兆揚州府幕友陳善諸生楊定

國濟寧衛指揮張鳳王清千戶張鑑

河標副將劉良弼

國朝兵河道李崑河標中軍副將吳道泰河標遊擊

張思孟白鴿營守備房星叅將惠世溥義士則

元段約李斌明王鑑吳自然鄭與僑

舉人孟挺蘓

成宗都督僉事陳永清常州副將

天祐

孝弟祠在鄉賢祠南知州藍應桂建

舊與忠義合在學西

祀元魏鐸明段瑀李守信蔣貞王果程選張濟

民劉汝新汝化湯之任徐守繕李鳴雷錢京天

啓丁卯舉人王道明

國朝傅光祚李耀昇張鳴鶴姜羽翔秦治世常省楊

芳昇閔萬錦劉泰徵曾繼祖鄒衍洙鄭學弦李

維心劉元忠潘夢麟楊瓚邱岳贈檢討潘好儉

進士熊士偉贈朝議大夫張世思貢生王勳按舊

志不甚清晰順治五年學碑有傳光祚諸人始畧有斷限

雍正元年禮部議覆行令直省州縣各建忠義

孝弟祠於學宮祠門內立石碑刊刻忠義孝弟
之人姓氏其已故者設立牌位

會典

節孝祠知州藍應桂卽忠義祠故址建又雍正三
年知州趙之鶴奉文建者在楊翰林街

忠義孝弟節孝祠帖文碑畧雍正元年九月初
五日奉

恩詔旌表節義乃彰善大典每見直省地方有力之家乃
能上達而鄉村貧窶之人則多湮沒無聞深可
憫惻着督撫學臣及有司遍加採訪務使苦寒
守節之家同霑恩澤至節婦年逾四十而身故

計其守節已歷十五載以上者亦宜酌量旌表
又旌表節義給銀建坊民間往往視爲具文未
曾建立恐日久仍至泯沒不能使人有所觀感
着於地方公所設立祠宇將前後忠孝節義之
人具標姓氏於其中已故者則設牌面於祠內
以時祭祀用以闡幽光而垂永久該部議奏欽
此部議敬請

勅下八旗直省督撫學臣令所在有司遍加採訪凡有節
義之人從前無力上達者盡行查出申報其守
節十五載以上年已四十而身故者亦令地方

官詳查報明一體旌表直省督撫學臣覈實歲終彙題八旗則該都統亦於歲終送部次年於二月內將前歲題送孝行節義彙疏題請旌表永爲定例其設立祠宇應行順天府奉天府直省各府州縣衛分別男女每處建立二祠一爲忠義孝弟祠建於學宮之內祠門內立石碑一道將前後忠義孝弟之人刊刻姓氏於上已故者設牌位於祠中一爲節孝祠別擇地營建祠門外建大坊一座將前後節孝婦女標題姓氏於上已故者設牌位於祠中八旗分左右

建二祠俱照此例每年春秋二祭既有官建祠
宇牌坊其建坊銀兩應行停止如本家有力者
仍聽其自行建造恭請

命下一體遵行元年九月三十日題十月初八日奉

旨孝行節義建立坊表恐年久毀壞今欲立祠特爲昭垂
久遠之計並非欲節省錢糧建坊銀仍着給與
餘依議欽此 云云 雍正三年冬知州趙之鶴立

石

二老堂爲明總河吳江周用玉山詹瀚建在學西

久圯 舊志

遺愛堂爲明總河王士翹陳堯建久圯

採訪

○明鄭真遺愛堂記自古聖帝明王膺圖建極必
有名世之佐依乘風雲贊調元化以成雍熙無
爲之治是皆關天地貞元之會遇氣運隆盛之
期間世而一僅見者夫豈偶然乎哉嘉靖甲子
夏初梧岡陳公奉簡命以司空卿貳兼御史中
丞來總河政駐節于濟甯踰期有詔遷司寇貳
卿蓋以梧岡公老成儀刑求置之左右隆其倚
毗實以啓沃勵翼屬之也公起家進士數歷中
外餘三十年所至

關二

樹芳軌振肅綱紀宣布

愷位望日崇而惠教益洽時聖天子應運中
興方隆唐虞之化而梧岡公砥節厲行闕耿執
法淹習典章敏達詳練海內以名世碩輔爲公
期待茲榮履新任必闕階孤卿爲國家之楨幹
於蒼生之望有大慰焉稽公之駐濟也彰善禁
慝風清弊絕尤加意教化率作士類勞翼獎勸
勉以蹈道履德期於大成且恤其急難周其匱
乏俾肆力進業由是士風丕變人文彬彬矣復
置學田若干頃畝以備掃除賑賙之需遠近頌
德士林風聲故於其行也濟之士庶感慕無已

僉謀肖公像而俎豆之先是吾崕王公以御史
中丞視河駐濟政治民安惟意文廟未修學宮
殿廡經閣門堂齋舍咸繕葺而載新丹青輝煥
登其堂如入孔室景行仰止泰山滄海之思油
然以興又於學後建崇樓於城之巔以應三台
是歲甲子例舉鄉士次年舉子偕計上南宮濟
之材登進爲盛其轉移陶埴固有所自也吾崕
公以進司徒貳卿而去濟士德公之深求以永
其澤乃順興志肖像而祀諸學宮已告成事矣
衆乃因梧岡公有大造於風教爰像公於學與

吾嵯公並祀於一堂豈非德盛化深使人戀戀
有餘思耶郡學博楊君時輝石君玳偕諸生白
駒劉珍韓原道張時敘周一夔王洧輩謁鄉大
夫鄭真爲文記石昭示不朽惟濟自建有視河
行臺蓋將幾及百年矣名臣鉅公相望先後而
吾嵯梧岡二公相繼以至皆恢拓學舍推尙聖
教講德考業斯道大明二公勲庸政蹟闕字二簡
冊當自有書而化民成俗此非其大致耶且其
風節氣概實相輝映其像於學宮時獲瞻仰光
霽而頌德祝下闕四字二公之澤斯民不徒其

發政之宜人而士民之所以有懷於不忘者又

有在於恩

闕

拊循之外

闕

亦梧岡公爽朗剛毅

醞藉宏深忠

下闕四字

正直修乎朝介潔慎乎

官惠利施乎下方隆

下闕四字

宸衷倚注忠勤

益抒行且流光奕世垂功竹帛所謂爲名世之

闕

依附昌期參天地之化關隆盛之運者非與

真因衆志受簡而書諸石吾嵯公名士翹安福

人梧岡公名堯通州人皆嘉靖間名進士法在

備書俾後有所考云

此碑今移學東報功祠下

按二老堂相傳祀吾嵯王公梧岡陳公卽于

念東中丞曹公德政碑記亦云惟廖志以二
老爲周公用詹公瀚今學西隙地羣指爲二
老堂故址者有碑存焉細審之乃遺愛堂碑
嘉靖四十四年太守鄭真記爲王陳二公作
也記中絕無二老字則知廖志謂二老爲周
詹兩公者未可遽云謬矣周詹兩公有功於
學與王陳同新學顏記可考也因萬歷志及
廖志俱不載遺愛堂故致傳訛耳張遂寧亮
州府志云二老堂康熙十八年靳公移於學
西然廖志刊於十一年已云二老堂在西矣

且萬歷志圖本在西與文昌祠遙對竊恐移而西者乃遺愛堂也

四忠祠祀楊佩李燭徐標任民育在學西遺愛堂後久圯今改祀忠義祠

○潘兆遴記畧明崇正之季濟人以死殉官者先後得四人順天府保定縣陞鄧州知州楊公佩深州知州李公燭同死壬午之難事聞贈山東布政使司叅議至總督畿南山東河北兵部尙書兼右僉都御史徐公標揚州府知府任公民育則死於最後故贈卹未及先後大節同炳日

星事久論定輿情鬱極濟人揮涕相告以爲人
臣事君至九死不回可以爲忠矣且同學比肩
接踵者有四人真名教之盛事而桑邦之極榮
也於是衆議僉同合詞請諸州牧申上官建祠
四楹於州儒學西偏之隙地爲一龕以合祀之
闢門二楹於東南隅爲神道額曰四忠祠經始
於康熙四十七年之初夏七閱月而告成以祠
筦鑰掌之四公裔孫之賢者非時勿啓以期潔
淨嚴肅祠東逼隣官舍後之司鐸者勿假祠作
書館接賓客貯器物更不得架矮屋於院宇穿

私竇於墻垣壅蔽喧湫以滋怨恫堂自墻南距

二老堂後墻五十尺東西繚垣距四十四尺四

公神位以爵序爵同以科分序首徐公次任公

楊公李公已丑孟秋潘應賓等公立

此碑今移忠義祠下

靳公祠在學東文昌祠後卽故講德書院

學校報功祠乾隆四十二年知州藍應桂卽舊靳

公祠建

祀元濟州達魯花赤冀德芳

首建學校

知濟州郭景

仁李宗武知州張仲仁同知濟州侯朝吾濟寧

路總管王德修濟寧路達魯花赤昇嘉訥及明

總河李如圭于湛周用詹瀚王士翹陳堯翁大
立曹時聘濟寧道高尙忠工部分司莫驪濟寧
府同知劉大昕知州傅霖蔣資陳亮蕭軌劉嗣
傳唐世柱

國朝總河靳輔河道葉方恒運河同知任璣知州吳
樾

文昌祠四楹在廟之東明宣德時建正統十年州
判王彥成修

國朝康熙十二年知州廖有恒學正趙自立重修乾
隆戊戌知州藍應桂改門南向上建魁星閣

明倫堂六楹在大成殿後明總河王士翹重建

國朝總河靳輔重建知州藍應桂修

號舍東西各七間嘉靖二十六年總河詹瀚建郎

中王九思記今無

西齋明洪武八年方克勤重建

據碑

興詩立禮成樂三齋在明倫堂東俱裁存一爲學

正署

舊志

按宣德六年碑陰有進德齋

齋長李翔謝垣

養正齋

齋長李英友長秦鼎周綬

修業齋

齋長王衡王謚

舊志不載

毀

西齋與

依仁齋在杏壇西牆外知州藍應桂建

講堂三楹周以垣門在二老堂後靳輔建

兗州府志

按講堂初擬爲講德書院旋移於學東康熙

四十七年改爲四忠祠

尊經閣在明倫堂後元大德三年知州李宗武建
至元三年知州僕朝吾修明總河王士翹重建

國朝總河靳輔修知州藍應桂重建

○元陳儼尊經閣記六經如日中天孰不知尊而
敬之哉宏惟濟密邇洙泗實六經所自出土生
其間其知尊之也久初無與於閣之有無雖然

學有書無所於圖則何以示崇敬此尊經閣所以作也越大德戊戌秋九月落成州人士相與言曰惟至元辛卯監州冀侯作新大成殿元貞乙未知州郭侯踵成既廡齋序門堂其事具翰林李公前後記中茲役也繫我李侯之力曷文諸石式垂前美是歲冬十二月州學正劉端仁浙西道庸田使柳侯之子師惠來東平謁儼出前益都經歷王端書且致州人士之言請曰侯自下車以作新民爲己任顧瞻廟貌按圖考制皆完之謂講授弦誦有堂有室獨經籍不屋以

藏豈不大闕行視其地疆逼弗稱遂購地三畝
於比鄰提點羅道義於是鳩工葺事並手偕作
屬役於州吏劉鉛陳謙縣典史王左州學直李
彰等侯爲指授面畫身任之僅五閱月而訖功
凡一錢不取於官民皆州僚吏大夫士不勸而
叶成也鄉士田章新除吳江州判官願以書五
千卷實其閣侯爲大書名扁其上是閣也山出
雲飛掀然竦於雲霄之表爲州中傑觀願有述
一以厲方來一以訓學者儼以軫去濟亦甚邇
來稱侯之治狀者不一而足於事當書其可毋

辭竊惟道在方冊易詩書春秋禮樂總不越數十卷見諸口用亦不越君臣父子兄弟夫婦朋友五者而已古之學者誠不外乎是耳世降鼓篋之徒遺其本而攻其末舍其晶而獵其粗雖曰治經實曰蝨經是以書愈多而愈不得其奧傳曰雖有嘉肴弗食不知其旨也以此伊袞游者移在閣之經在腹遙在腹之經在日用至於遙邇在國在天下特舉而措之耳若所謂束書不觀遊談無根效尤滋甚顧華櫝緹巾之宮籤綺裘之盛直爲觀美可也豈聖天子下

學之意乎豈良民吏儲書作士之望乎凡在門
牆其以是相諭侯名宗武字克誠洛陽名門由
戶部員外郎授奉直大夫知此州至於廳事驛
舍譙門三皇廟皆葺而一新特因農隙悅以使
之故民不知勞云翰林直學士奉訓大夫知制
誥同修國史陳儼記儒林郎前秘書上監楊桓
篆額書丹大德三年夏四月庚午州學正劉瑞
仁等立石監修州吏閤中孚石匠提領王欽刊
按此記舊志不載萬歷志有之而首尾不相
應蓋與明正統學正陳瑄尊經閣記錯簡今

據碑正之多異字如精作晶殿作𡩂棲作𡩂
○元王宜振重修尊經閣記學者欲求帝王之治
於千百世之下者惟觀乎道欲求帝王之治與
道惟觀乎經經所以載道也人之所以爲人帝
王之所以爲治聖人之所以爲教何莫非道筆
之於經垂之萬世昭若日月人生於數千百載
之下不能得聖人之道於口傳面命之間則考
之於經信而有徵不啻如親相授受舉而措之
國家天下施之禮樂刑政士君子得之以膏
其胸臆黼黻其文章發揮其事業經之

人也多矣學校乃宣明教化之地聖人以道爲
教將以厚人倫美教化移風俗捨經何以哉閣
而庋之時而閱之戟冠博帶以臨之以示尊禮
之意此閣之所以名也濟爲四瀆之一距洙泗
爲甚近杏壇木鐸之遺響日接於時人之耳目
經訓修明道化淪浹千載一日衣冠文物之盛
甲於他所巍然靈光宮殿突兀環以三門翼以
兩廡聖師像位繪塑如法又有重簷傑閣屹乎
其中榜曰尊經凡古今之奎章寶畫聖經賢傳
諸子百家奇聞異見之書皆錦標玉軸寶而藏

之於其上以垂久遠向所謂石渠天祿芸閣秘
府之儲將不是過蓋大德戊戌知州克成李侯
之所建距今二百餘甲子矣歷歲愈遠摧圯滋
甚職教者以歲入之不給坐視其敝而莫之恤
甚非所以尊禮聖經之意元統乙亥之夏同知
僕朝吾來佐是邦見而惻然大懼風雨凌震檣
桷腐落倒架傾簾散亂編帙使爲士者於聖人
之教無所聞爲政者於古帝王之治與道無所
見將何以訓於今而傳於後此實有關於風化
之大者乃喟然嘆曰朝吾不才聞道最後雖不

獲親炙聖訓猶幸得口誦聖經接於目而會於
心以增益其所未能今承乏此來適觀斯敝安
敢以郡事之不理爲辭而付之悠悠乎乃斷自
心畫會材委工而經理之工費浩繁學無恒產
則首捐廩稍以爲之倡不給則以諗夫邦大夫
士之仁且賢者與夫民之可以義起者以贊其
成傑棟飛雲重簷溜雨梯衡案稅並暨丹牖咸
與維新爽而不卑文而不華廼架廼櫝經史異
嚮軸帶帙籤新若未觸觀者讚歎旣成僕君以
疇昔之知貽書遠來求余文以爲記將勒之石

以傳久遠余雖不獲親覩其盛然亦喜聞而樂道之乃爲之說曰大哉聖人之道乎窮天地亘古今而不可泯也人文肇開明聖繼作宓犧氏以書契代結繩而文籍生焉自是以來歷皇帝主霸漢晉隋唐幾千百年以迄於今而其爲經則有墳典索邱易書詩春秋禮樂與歷代之信史及百氏絺章繪句散滿天下其人亡其書存其政與教未嘗不舉也嗚呼經之不可一日無也如是僕君撤而新之以固其藏其爲天下後世慮也遠矣是不可以不書僕若字世則妙齡

好學至治辛酉進士其昆季登上第者六人詩
書之澤未艾也故其爲政知所本云

按尊經閣尙有明時學正陳瑄碑記爲後人
磨去明倫堂前魁字石背刻指南二字者是
也尙有磨不盡者隱隱可辨

敬一亭在尊經閣後今改作

按明嘉靖五年御製敬一箴六年令天下刻
石學宮因建亭以覆之敬一箴居中旁列石
刻程子四箴及范香溪浚心箴注釋

國朝康熙十八年總河靳輔重建乾隆四十一年知

州藍應桂改爲崇聖祠移諸石刻於尊經閣下

龍章閣嘉靖二十四年總河周用詹瀚建在敬一亭後久廢

樊維祖碑記明倫堂後有尊經閣閣後敬一亭陰爲居民僦占因售其址建閣於上尊奉御

製前與尊經閣相輝映崇聖製也

按此則今杏壇卽其故址

杏壇亭在崇聖祠後知州藍應桂建

學正署舊賃居學外康熙十七年運河同知任璣揆度明倫堂東空地請於道憲及河臺命州學正

孟鏐募建費工料銀三百金募諸生得半餘半學
正輸宅後房五區門役居之宅西自東齋房至名
宦祠東南北長十八丈許界以墻垣宛州府志
射圃康熙五年總河盧崇峻改入河院署

按明洪武三年詔定學校射儀築射圃建觀
德亭今之存者鮮矣

學基界址四至

前至太和元氣照壁南民舍墻址東至民舍西
至龍門迄北與倉基隣後至城墻康熙十九年
靳公所清學基界址自櫺星門起至啓聖祠後

墻止南廣五十四步一尺北廣三十九步不等
南北長一百三十一步共計二十三畝二分二
釐零櫺星影壁內外東至東牌坊西至西牌坊
南至影壁迤南路口南廣十九步一尺北廣四
十二步不等南北長四十六步一尺共計四畝
六分九釐零東宮墻外東至方宅止留滴水地
廣二分至一尺不等南北長三十一步共計地
三分五釐零西宮墻外西至水池東涯止留滴
水地北廣一尺南廣四步一尺不等南北長一
百三十一步共計地八分一釐零水池原屬

內基地東至西宮牆滴水地西至永豐倉基北
至謝延祖宅南至路南廣四步北廣二十步南
北長一百四十六步一尺共計地七畝四分九
釐零北宮牆外東至楊碑西至水池東涯北至
許姓南北廣十五步一尺東西長二十五步共
計地一畝五分七釐零永豐倉西原有學基一
段南至街北至水池東至路西至預備倉基南
廣十五步二尺北廣十一步不等南北長一百
步共計地四畝二分八釐零分巡濟寧道按察
司僉事葉方恒兗州府運河同知任璣濟寧州

知州趙鍾華州同任三益判官甯紹先吏目王之輔學正孟鏐立石

舊志參
石刻

儒學在州治東北至元間監州冀德方始創廟宇其後知州郭景仁李宗武張仲仁總管王德修相繼重修明洪武三年同知劉大昕正統間知州陳亮相繼重修規制與他州同大成殿後爲明倫堂五間堂後爲尊經閣五間閣後爲敬一亭亭後爲啓聖祠左爲名宦祠右爲鄉賢祠萬歷三十五年知州劉嗣傳重修郡人于若瀛有記四十三年知州唐世柱重修

國朝順治五年總河楊方興重修九年郡人鄭與僑等捐葺後不知何時民居錯處蕪穢不堪康熙十七年總河部院靳輔捐金倡修徙居民廓清地基命濟寧道葉方恒協理管理運河廳同知任璣督修遂將大成殿神門櫺星門撤而新之殿後兩齋東西義禮二門及尊經閣敬一亭並爲重建更擴兩齋之十二間爲十八間二老堂以祀總河陳公堯王公士翹舊在學東偏移建西偏堂後建講堂三楹周以垣門東西兩廡自明倫堂以至門外崇聖育賢兩坊並加重修學

宮周圍繚以垣舊影壁去櫺星門南遠行人穿過褻嫖移近內數武兩翼亦益以垣東西建柵欄門各一以止行人由影壁南行壁前左右近民居仍界以牆有碑記運河同知任璣倡議建學正宅康熙二十年秋雨潦大降學宮西北隅水深五尺鄉賢祠圯州紳王天眷鄭與僑等糾金重建運河廳同知任璣捐金助成州判任紹先輸貲修砌神臺二十一年貢生陳心祐生員駱日新等糾金造啓聖及配享先賢先儒神龕三座栽松柏樹百株學正孟鏐生員王文學各

輸銀造

先師座前黃綾帳幔一掛四配四掛

克州府舊志

○元李謙重建大成殿記濟州自五代治鉅野地居下流河數爲患金天德三年徙治任城任城古風姓國漢魏嘗封建宗王映滄之潤接洙泗聖人遺化在焉戶知讀書人漸禮訓前代名士輩出故其廟學視他郡爲尤盛金季游經喪亂惟柱礎僅存革代以來爲州者創小殿五間於故基之前象設雖具而規制狹隘不足以展禮容嗣政率因循苟簡安於固陋至元甲申朝城

冀侯德方自沛來監是郡居久之政通人和廼
興滯補弊百廢俱舉顧瞻廟貌謂寮屬曰是爲
興化之地而庠陋若是吾屬爲國牧民不致力
乃復可乎首捐已俸爲諸人倡取材於山得巨
木度故柱礎跨而梁之爲大殿五間經始於庚
寅秋落成於明年夏高明堅整於郡治甚實宜
稱若賢庶若師生之舍方次第作新而入爲監
察御史先是侯具書幣聘東平文儒楊演主教
導陶冶士類居數年作成者爲多侯旣去諸生
合鄉耆請記其事竊惟吾夫子述二帝三王之

道載之六經傳信萬世後之爲天下國家者咸
取法焉所以措世康平躋民仁壽者由斯道也
自京師至郡邑皆崇設廟祀有以也夫世之爲
吏者類以簿書期會趣時應務爲急殊不知身
任師帥之寄尊道勸學崇化美俗固職分所當
然漢循吏如文翁衛颯所以著之史傳垂芳後
世者非以興起學宮修庠序之教故耶冀侯之
政豈必減古人哉惟其良法美意設施未究郡
人以是惜之京師首善之地趨建之始有所未
遑侯進當言路後日建學興禮以風四方者尙

自侯發之

至元三十年碑記剝落
特甚碑仆地今重立

○李謙濟州修學後記至元二十九年監濟州冀
侯德方新作 大成殿甫成入爲監察御史越
明年其子泰襲爵又明年雲內郭侯景仁自孟
州來知州事謁拜之日見其殿宇崇峻而兩廡
闕然門觀堂序庫陋莫稱乃謀於冀侯曰聖天
子卽位之始首以興學詔天下而吾州密邇闕
里未有以稱明詔其可乎且尊府興作之初意
將不特止此聞公帑尙有餘貲在盍圖之冀侯
復曰泰以非才猥嗣郡寄逮今裁朞月繼成初

志誠有所未遑幸今公至言興斯役圖之此其
時矣敢不勉左右之翼日詢諸同僚更倡迭
和莫有異議乃擇謹厚可授以事者得州吏劉
鈇王居柔張仲則以役屬焉居頃之同知州事
劉庭玉判官和洽相繼受代郭侯身任其責首
捐俸金相以力役爲諸人倡視事稍隙則以身
董之風雨寒暑不恤故人各赴功惟恐其後爲
東西廡爲神門爲講授之室爲弦誦之舍又度
學西南外墻隙地爲屋以居教官絜其楹蓋無
慮百餘計經始於元貞元年之春落成於二年

之冬執其勞者皆州縣僚屬若士夫之家細民
無及焉州學正馬益狀其事以記爲請竊謂大
成殿之役嘗不自揆度已記之矣其可再乎益
復申郡人之言不得辭告之曰爲治有本有末
爲學亦然剏煩理劇斷獄聽訟徵發賦歛以應
公上之須治之末也興學以明教化厚風俗勵
賢才其爲治之本與灑掃應對記誦詞章以謹
衆干時學之末也明經學道以志乎爲己其爲
學之本與州當南北水陸之衝冠蓋相望送往
迎來蓋無虛日郡務叢沓率常倥傯不暇俟於

其時而能以修學爲先可謂知所本矣學者被
荷惠淑之意蓋亦務其遠者大者以究其爲學
之本也二年冬十有一月壬午日長至翰林學
士大中大夫知制誥同修國史李謙記

○元辛明遠重修廟學記天家包舉六合誕敷文
德涵毓元元匡直輔翼俾自得而振德之由京
師以及郡邑莫不廟祀孔子敦化原也濟州孔
子廟其始狹陋不稱至元末監州朝城冀德方
肇增崇殿宇繼而雲內郭君景仁洛陽李君宗
武爲州經營締構門廡書閣講室齋次峻峙雄

列岑乎其巍翬乎其飛邈乎其餘州不可得而
擬也厥後綿歷歲月風雨攸食日漸月漬木朽
土渝傾圯殆甚至順癸酉祁陽張侯仲仁來知
州事下車謁拜覩其如此大懼失聖天子褒崇
宏獎之旨而不能承宣慨然以重新爲已任卽
會僚佐同知忽都不華判官周顯祖幕賓劉良
成讜謀之旣僉協遂各捐俸半載復資諸好事
者得楮券八千餘緡俾廉濟州吏陳素義士周
傑掌其出納市材傭工差日就緒工致其能徒
效其勤烝烝芹宮萬指偕作斷鏤榜壁標法

獲究於三月乃克成功正殿而下訖於齋舍五十餘楹截然一新儼偉絢麗噲噲噦噦其正而冥也將落之判官張忽都帖木兒由宣徽譯史至旣而州倅進士僕輟吾由枝江縣監至目擊其事嘉侯之用心行且受代不可使徽績泯爾無聞命郡文學趙商輔具石篆蓋趙與侯有一日之雅適僑於濟商輔等以處士段寬事狀蘄文辭請再三謹爲次第其歲又惟興化致理莫先學校侯能循序急所先務俾郡之人顧瞻所以崇敬聖人之至爲學之念油然而生父兄命

之子弟率從弦誦載興比屋達境軋乎鄒魯之
盛將見鉅儒名卿間見迭出於時矣曩東平行
臺嚴公興學養士其所以作興人材爲天下稱
收實效而貽鴻休至今賴之濟鄆接壤耳目尙
新無煩徵古詩曰豈弟君子遐不作人若天推
侯之心追嚴公之迹以興學育才爲首著菁莪
之美勿替引之則侯乎君子焉耳元統三年記
○元孔克堅重修文廟記維至正十有三年春三
月丙子朝請大夫濟寧路總管王侯德修出守
茲郡未及半載載瞻泮宮歲久就圯教法弗張

學徒益解州固魯邦四方所望郡治直西有河
決之害徙往而東化州爲郡文學弗崇何以示
化元興承平幾百年物盛氣極茅斯孽矣蜂屯
鼠啾嘯呼聚謀首撼尾應相煽繼起大郡攻城
邑小郡肆剽刼大軍行誅至於今未弭郡當南
北要衝軍興儲峙饔餼之需砥鍛棚殼之具凜
凜恒懼之弗繼俟於此時乃能礪志斯事獨有
其功可謂難矣大成殿旣集次而廡若門若堂
若尊經閣若墻若塗旣斷旣度旣礪旣甃乃黜
乃聖乃墜乃茨凡用至正新幣二百錠准錢緡

千以三月八日經始六月廿日訖工作凡百日
罷請立石刻其文曰若昔魯僖能作泮宮史臣
克作頌以顯其功遂荒徐宅莫不率從王侯作
守實維魯邦徐戎方殄淮夷繼起大軍行誅三
歲未弭芻茭山堆糗糧阜庠恒懼之弗給重獲
罪以死侯以其間作廟有翼戈甲如林不懈益
力俾四方觀者知其爲禮義之國庶化兇器及
彼蠻貊因茲革面豈曰無益僖旣得頌侯亦思
紹馴梗爲柔罔不在教請刻此石光垂宮廟

○明靳學顏修學記畧按志濟寧州學蓋創自今

元迄今三百餘年地縱廣僅若干丈前爲先師廟櫺星戟門殿廡率用王者事亦時有修治毋壞殿後不數弓爲明倫堂其高視殿僅十之六七又逼仄所與并讓而講其中者爲師四人弟子殆四百人不中旋折位置罔序堂後僅三大爲尊經閣復簷四敞而中隘無所貯亦莫可陟降閣後地益湫下跼促堪興家言應在士仕中阨不利遠昌嘉靖癸卯以來工部尙書吳江周公都御史玉山詹公始相繼出藏金鬻閣後民地北拓若干丈築土增高建龍章閣饌堂暨諸

生號舍若干間而勢若舒以達矣然明倫堂與
閣既逼弗稱又日剝圯未有撤而易者去年壬
戌三月安福吾嵯王公以都御史奉制書蒞濟
三日謁廟禮成退而受師生謁於堂載觀於閣
謂諸生曰是弗改弗稱弗稱弗宜也諸生舉前
事對公毅然曰吾能新之於是歸坐府中召匠
者手圖以示曰堂視舊高八尺深九尺去殿而
北六丈六尺五寸閣去堂而北又六丈視舊高
深各加九尺縱廣加二丈有奇歲終當告成事
遂檄所司以費計工乃諸生相顧賀而半疑信

焉所司捧檄難之聽而請曰費鉅安出公曰不
官不民不汝瑕疵請輸作曰河夫之歇役請監
工曰河員請石曰修牖之餘請鉅材曰第爲基
基成而材至公視門下人某予之金三百曰持
吾檄往某所易木以某期至果如言季秋漕務
稍集羣工乃發胥役輪番官師迭省而諸生有
父若兄弟聞聲慕義躬親土木經離寒暑不賞
而勸以臻厥成又掄其餘材盡易諸解以居學
官又闢隙地爲永巷而東出作學門以應生氣
咸如公指費金凡若干其四百餘兩蓋其私錢

云

○明鄭真重修濟寧州學宮記夫學校者賢士所
由出教化者興賢之基本而天地運會之逢山
川和粹之秘人事相參而互協之考之古今仁
賢際運奮庸道繼斯文業稱名世其生也有所
徵其出也有所爲夫豈偶然哉由是觀天下之
材始而育之以學校之關躡之以振率之機而
山靈川秀神涵氣毓天人交應而後人文應期
間出故曰賢才之生關天地之化儲海嶽之精
含間氣之期正國家之瑞固非漫然無因也濟

寧壤接鄒阜封域脉絡聯續泰嶧汶泗諸山川
含英蘊華隱鬱停伏至濟乃發而南駛與黃河
會流成汪洋巨津下呂梁入清淮注之海是以
我國家肇造洪基垂二百年濟之英賢傑士後
先接跡視東省諸郡邑爲獨盛往者洸泗之水
匯流於濟泗水由馬驛橋而東直達天井洸水
轉而北更折而西由會通橋合汶水至濟安之
草橋東流至觀瀾亭始與泗水會流下天井環
城抱遶若玉帶然迨後洸水失其故道乃於林
家橋與泗水合流逕達天井無復舊時帶環勝

跡隆慶戊辰屬黃河淤決漕艱孔棘帝簡時望
起見海翁大中丞託以奠平水土重寄公開府
於濟展謁學宮坐明倫堂論析五經惓惓以率
作培養士氣爲首務進郡大夫學博士語之曰
濟固多才之地也山靈川秀未盡宣鬯宮墻陋
隘弗稱偉觀今濟城東洸泗之水直達天井失
其分流之勢盍開其故道以復帶流之舊乎且
櫺星門外逼鄰闐闐湫隘囂塵甚非所以嚴具
瞻崇禮教也先聖之道與天地日月貞觀並明
而學宮浸漶不治其何以妥神而歆祀也耶計

欲闢治拓廣以遠喧溷其殿廡齋舍爲積霖圯
剝者補葺而更新之士習固有待而興或將因
作新而不變人才當益彬彬矣凡庀工飭材百
凡需費悉河道贏餘檄郡守譚大夫經理其役
而大夫嚮意人文雅崇教化尤悉心幹濟工於
隆慶四年六月初一日凡四閱月而告成事學
舍改觀河流帶遶山川含秀積百數十年而盡
發洩宮牆偉壯絕遠淆喧覺宇煥崇觀視祇肅
豈非濟郡文運之一大慶會乎豈不有仁賢乘
運間出以名世乎又豈不有德行文學如七十

子之速肖以續斯道之統無忝大聖大賢之鄉
人乎蓋人才盛衰誠關氣運而作興引翼實在
上者之權衡公政先文教拓飭學宮士風振厲
是年秋薦魁盛於東省其轉移化導之機天人
合發不益信然乎哉方公之來治河也沿流上
下不辭勞瘁興作開築功惟求永經營再踰期
月洪波安流漕渠永賴時連值水荒公憂勞援
拯括災民役夫運戍渰沒避徙勞瘁之狀并古
今遇災修省之實列圖疏奏皇上嘉納報可公
承制恤賑民忘其災河成奏績進公司空

司馬蓋公浚明敏達體國憂民獨受上知特茲
大授也而其道德文章孤節潔操爲當代師式
自筮仕迄今所至飭肅紀綱頒布愷悌過化棠
陰咸感慕而俎豆之今還朝必將履師保端揆
之重弼承寅亮以福蒼生以綿社稷無疆之慶
郡大夫譚公經等僉謀謂公開治學宮作新士
類於濟遺永世之澤不可無紀述乃屬真次第
其事而爲之記如公之識兼文武全德難名功
在天下譽垂鼎彝太史氏能筆之茲不備云

○明于若瀛重修廟學記畧我太祖高皇帝首重

斯文列聖相承躬祀孔子惟茲教化隆洽於今
爲烈吾濟又近聖人之居去闕里僅三舍亡論
發明聖道代有其人卽俊選爲弟子者多取上
第二百年來彬彬盛矣邇者學宮頽圯萬歷丙
午郡侯劉公惕然興感曰此守事無難捐俸新
之遂出金若干兩爲倡郡士大夫及孝廉博士
弟子各有捐助以署學正張君應完董厥事訓
導韓君珣孟君周孫君茂蘭協贊之斷材陶甃
更者塞外池依頽而橋其上易坊爲櫺星門外
設屏因者白雲路崇聖學育賢才三坊曰戟門

曰傍大門中門曰大成殿曰啓聖文昌名宦鄉
賢四祠曰尊經閣曰明倫堂曰二老堂曰敬一
亭曰兩廡曰齋宿省牲所曰前後四齋曰郡博
士四衙煥乎一新矣張君等乃伐石徵予言以
紀侯之績侯名嗣傳甲辰進士蜀之漢州人

○于若瀛總河曹公興學德政碑記濟甯水衡高
處析流南北爲漕距黃河二百餘里設總河大
臣督理之嘉隆間或革或復今上御極河漸多事
近且廢總漕歸總河萬歷辛丑決濠牆凡兩易
總河大臣不得治仍議分河與漕如舊俾專力

於河甲辰李少保公至塞蒙牆黃河由朱旺口而東流亡幾復決太行堤自飛雲橋穿夏鎮滙呂蒙湖汎濫矣朱旺復淤往稱腴壤者淋漉成巨浸悉可駕余皇施戩而豐沛魚棠當全溺靡所依闔地爲廬皆亡去卽濟水衡高亦灌踰南陽漸及于郭少保公丁內艱不及理於時議代者非素深知河不克任乃疏公上蓋以公素爲濟監司治河者也制曰可公曩爲濟監司潔已繩屬裁冗剔蠹大遺愛于濟皆呼爲曹青天濟父老子弟聞公來咸以手加額比屋設曹青天

位迓之歡聲若雷公旣至乃慰父老子弟曰若
毋虞水及郭第未筴流之所以橫者吾爲若筴
矣乃操舫艫委其身於河審地卑阜洞朱旺口
所以再闢再淤之故計工八十萬金錢條疏以
上允其請更假以便宜鳩工胼胝不半載而河
成黃旣東曩所謂潏潏巨津可駕余皇施戔者
復露爲腴壤受播矣其靡所依闔地爲廬亡去
者還而營家男卽畝女卽紅蕖高枕而食所在
有矣公乃去供億之不式以恤無歲者又令有
司緩徵毋過苦已而集諸生曰濟素稱獻國往

吾爲監司時貢士多登額今稍稍遜昔日矣且學宮傾圯將何以羣子弟而經義督策之於是捐金一百兩檄劉侯修學侯奉公德意亦捐俸倡衆庶民子來旣落成諸生咸感奮自修礱石紀公嘉惠後學盛舉問言於余余曰公河臣也急在河則胼胝且亡暇而暇及學宮嘉靖中有梧崖王公者捐俸葺廟學又移城之得勝樓於後與尊經閣翬飛相映工未竣遷去梧岡陳公繼至詢其未經者續之僉謂王經始陳落成皆有功於廟學不可忘也乃於學傍得隙地斷茅

爲屋三楹貌祀之曰二老堂夫二老亦河臣也
於時徐呂間河流湯湯無恙也亡動衆大役也
帑藏充也暇也猶合兩公共成之今視昔何若
矣黃河之患南之嚙陵寢北之蕩城郭束之於
中不受則旁溢而餉艘每歲銜尾一至河不潤
無以達京師又帑藏空靡所取給河臣且數易
矣凡談及河事者輒吐舌不能收以歸於必不
得之數而公處之以暇豫不半載而功成又捐
俸興學不少後則嘉惠後學一念較王陳兩公
不更篤而其功不更偉與他日二老堂且參公

而三矣公諱時聘登辛未進士真定之獲鹿人
其總河也潔已繩屬裁冗剔蠹亦無異爲濟監
司時茲不具述述其所以興學者如此而系之
辭辭曰於維河宗應漢而東潛行分源淪蒲入
蔥孟門大溢疏爲彭豐呂梁旣發王氣攸鍾邇
卜爲崇匪梁崩壅惟公乘載璧馬罔庸郡汎旋
陸水伯順恭於時之隙以覆黷宮髹黻撤圻甍
宇聿豐奮彼羽籥俗敦化崇無德不報有施且
隆河行教敷疇數其功千百斯年感奮攸同
○總河靳輔重修濟寧學碑記畧濟寧故任國也

其距闕里也僅二舍餘東接鄒西鄰武城洙沂
洙泗諸水經流乎境內洋洋乎聖賢教澤漸被
而涵濡之也不深且遠哉粵若此邦名德則任
子不齊爲孔門七十子之一他如閔子原子季
路子貢子羔子遲之徒或生或葬或僑居茲土
遺蹟昭昭在人耳目逮孟子時以季任慕道亦
嘗由鄒之任云夫以近聖人居若此其甚而羣
賢萃處流風未泯宜其俗猶愿朴多善良士閭
里相親睦敦彝倫鮮暴戾恣睢之習信如舊誌
所傳矣念昔魯侯在泮小大從公順長道而屈

羣醜乃至飛鴉亦懷好音幾與鎬京辟雍媲美
則崇厲學校若是其重以亟也若濟之承流於
魯也多士德心匪偏詘也今類林芹藻猶與棧
樸菁莪競秀否乎逮夙駕戾止周覽廟庭則廟
貌圯矣學宮荒矣不爽塏而湫隘則廬舍櫛比
其間蕪穢不除畜牧充牣嘻其甚矣恠而詰夫
司鐸則曰是傍附編氓僦居隙地以贍學租之
匱沿而弗禁久矣噫有是哉義利之辨不明孰
不可忍者是用痛心疾首檄諸學使亟罷之爲
溺職戒屏厥竄處而繚以周垣如故址罔得越

已廼倡率僚屬捐俸而鼎新之一時同志響應
工作畢舉廢者重建敝者增修自康熙戊午夏
五經始迄己未仲冬落成丹雘旣施貞珉用紀
於戲政教首係乎學校振古如茲凡爲吏當知
先務矧濟州士庶密邇杏壇曾不若深山窮谷
猶知誦法聖訓而尊奉之緇流羽客且能維護
法門而崇飾之相率爲因循苟且而末務視之
淪胥至此未聞怒焉省憂者則安冀其興化振
俗復古返始乎夫興化振俗若礪器然先飭其
具而後材可成今學之修也具則已完矣復古

返始若濬渠然毋壅其流而後源可遯今廟之
修也流則已導矣若夫由是而良其材俾勿窳
探其源無或昧自在官師之守偕此邦之人勉
進之哉余雖皇皇焉閔厥蠱壤一試整飭而胼
胝河干席不暇煖安所得從容升降其中與都
人士講求聖賢遺意則繼此之事多志焉未逮
者予曰望之而不能悉誌其說也

附記增修各工大成殿兩廡四十四間啓聖祠
名宦祠鄉賢祠櫺星門東西兩學門八字牆明
倫堂尊經閣又重建各工戟門敬一亭二老堂
并門樓二座又影壁兩欄門兩牌坊東西兩學
房十八間并門樓二座週圍界牆共一百六十五丈通計用銀三千四十四兩

○藍應桂重修學宮記濟州學宮自康熙己未
文襄公大修以後其間幾百年矣其間州守吳
公會加塗墍丹雘而乾隆丁卯里人李廷鈺捐
金二千其所修止於

大成殿及文昌祠而已其餘半爲棧蕪瓦礫之場
凡莅任於此者非不有心大舉而經費無出或
席不暇暖徒存虛願余自壬辰承乏於茲忽忽
屢易星霜風塵簿書碌碌未暇每卽黌宮未嘗
不爲之踟躕也至丙申秋始發憤捐金首倡自
殿廡至櫺星門外左右坊以次整理丁酉二月

又自明倫堂以後興工幸天氣晴和圻人梓人寒暑不輟得以從容而告歲事亦天假之緣也總而計之有因其舊而新之者

大成殿明倫堂及戟門影壁左右坊是也有重建者櫺星門兩廡崇聖名宦鄉賢忠義孝弟諸祠與尊經閣是也有特創者杏壇及養雲亭觀瀾臺是也而周垣一百六十餘丈亦皆重築而覆以甍甍焉其位置則忠義孝弟祠向在學西垣外今與名宦鄉賢二祠相比皆翼於崇聖祠之前蓋崇聖祠卽昔之敬一亭而杏壇卽昔之崇

聖祠也於丁酉仲冬旣望落成又舊學西有二
老堂遺愛堂東有靳公祠皆以報其振興學校
之功惟靳公祠僅存亦污穢狼籍今爲重築易
名報功自元以來有功學校者並祀之其南則
文昌祠移其門南向上建魁星閣舊所無也先
是雍正初奉文建節婦祠在城東南隅今更建
於舊忠義孝弟祠故址別自爲門以便出入復
於節孝祠之北爲依仁齋齋東爲門與杏壇相
通以便講道論德者棲息之所興工於今歲二
月至六月畢工前後興作凡三閱寒暑費白金

九千餘兩諸紳士所樂助者居三之二其餘則
余所拮据也去歲三月濬泮池忽有泉湧出池
西枯槐重生且茂州人相賀以爲天與人文之
兆及秋闈榜發獲雋者四人解首與焉又武闈
領解者亦州之北鄉人而籍汶上者也天人感
應之理容或有之然亦氣運之自然余不敢貪
天之功以爲己力特靳公爲河帥時總督山東
江南河南三省且廟學敝敗不至如今之甚所
費特三千金而已今以一州一人之力經營慘
淡所費不啻再倍余之心力瘁於是矣昔之爲

學記者首推南豐臨川而項平甫枝江學記三
遵巖夏津學記皆人所傳頌發揮已盡無取可
瀆陳言但據事直書記其興工告成之歲月而
已其助余董役始終任勞不倦者膠州諸生墨
雲崔子儒眎也乾隆四十有三年歲次戊戌季
夏某日立石

清寧直隸州志

卷八

四

學田

舊無額設後額外設立學田二頃九十六畝八分七釐有奇每畝徵租二分歲解學道共該銀五兩九錢三分七釐有奇

舊志

生員額入學二十名廩膳生三十名增廣生二十名。

舊例入學一州及汶上嘉祥魚臺三邑撥入兗州府學者四名乾隆四十一年改直隸州照雍正八年東省例於府學額以二名撥入州學所有本撥給二名以一名定爲州其餘一名三屬

按次輪撥武童亦然

文案

明陳伯友唐肇元

世杜

郡伯課最榮封序云州武

儒童常千有餘公曰濟縱多材安得如此壅積乎童而稍長者進曰濟以一州兼附兩衛民間之習於誦讀者固多而軍丁之求爲進取者亦復不少乃額取如故也公以詢於諸士曰果若孺子之言則濟材之沉淪多矣且凡天下有衛之處多立衛學况兩衛乎奈何其以相涸竭之士曰濟之受扼固也儒童之難於進取特一耳且補廩起貢額設三十分之兩衛各十

止得十人反不如小邑尚有廩二十也臨清衛
遷而軍丁未遷臨清有衛之名而無衛之實補
廩起貢未見其少濟寧有併衛之實補廩起貢
未見其多懸絕如此安得稱平惟是比之德州
兩衛則設學亦宜同耳而公因豁然爲主此議
取儒童卽分州衛兩案嗣向德州討取故實又
諄諄與上官言據諸士議爲之請命無不劃然
允者後雖以鄰郡比例而暫罷然而此議終不

可罷也

海鷗
居集

鄉飲賓

劉紳

馮尙賢

李斌

尹忠臣

李文甫

魏遷

倪宗武

李經世

以上
舊志

史大倫

乾隆時

孫文載

介

王天珍

僕

楊名案

劉文蘓

介

李穎秀

王繼昌

王惠

王衍曾

僕

上採訪

社學

社學自明以來續設共十九處俱成荒燼

國初特設三處城中一處南關人稠地二處

舊志

舊在城四關八處四鄉五處無存康熙十三年

總河王光裕字中立捐俸九十八兩有奇建設
三處一在儒學一在草橋一在工部分司東每
處置房六間圍墻一座延師化導俾先知孝弟
以敦倫紀次習經藝以圖進取禮教日宣澆薄

頓洗

全上

社學始自明洪武八年延師以教民間子弟兼
讀御製大誥及本朝律令正統時許補儒學生
員宏治十七年令各府州縣建立社學選擇明
師民間幼童十五以下者送入讀書講習冠昏
喪祭之禮其法久廢寢不舉行

明史

順治九年題准每鄉置社學一區擇文義通曉
行誼謹厚者充社師免其徭役量給廩餼優贍
提學按臨日造姓名冊申報查考康熙二十五
年覆准州縣社學近多冒濫令提學嚴行查革
雍正元年覆准州縣設學多在城市鄉民子弟
不能到學照順治九年例州縣於大鄉鉅堡各
置社學一區擇生員學優行端者補充社師免
其差役量給廩餼凡近鄉子弟年十二以上二
十以內有志學文者俱令入學肄業造姓名冊
於學臣按臨日申報查考如社學中有能文進

學者將社師從優獎賞如怠於教習鑽營充納
查出褫革併該管官嚴加議處務期啓發蒙童
成就俊乂以修三代術序之法會典

社田

舊社有學無田不十載而學廢康熙十三年總
河王光裕又查得無礙官地作延師之資一在
大教場東不妨操演閑地一頃一十四畝又城
西北二面地一頃二十六畝共二頃四十畝令
每處分給八十畝概免差徭舊志

三姓義學在城東坨河村人祝氏唐氏劉氏三姓

捐地共建

採訪

康熙五十二年令天下州縣多立義學雍正元年凡現任官員自立生祠書院皆令改為義學

會典

仲博士宅在城南四十里仲廟旁康熙三十八年

賜第

兗州府舊志

仲氏高辛氏之後高辛氏有才子八人仲曰堪子孫因以仲為姓其後有仲溶為魯卞邑大夫遂居卞城鄉生子奐奐生式式生度度生肇肇生拱拱北生鳧鳧娶宋氏於周景王三年已

未九月初七日生仲由卽魯襄公三十一年也
子二子崔子啓宗支世系家乘畧具其聞達子
孫世次可考者自二代子崔以下十一代光漢
右扶風二十一代時鳴舉孝廉二十三代泉晉
尙書三十五代子陵唐舉賢良官常侍四十五
代簡宋進士官刑部郎仲氏自漢更始中十七
代孫避亂移居濟寧至明萬歷十五年五十九
代呂復居泗水縣六十代銓六十一代則顯皆
爲奉祀生至崇正十六年以衍聖公孔允植之
請爲先賢仲子設立博士查明六十一代仲子

陞應襲

通志

仲子陞

國朝順治二年授職

仲秉貞

康熙十一年承襲

仲承述

四十六年承襲

仲蘊錦

雍正四年承襲

仲振棕

乾隆二十三年承襲

仲耀涵

二十六年承襲

仲

閔氏五經博士居北門內郭家園

採訪

先賢閔子其先魯公族僖公元年季友請立閔

公後以其子子魯奉祀始姓閔氏子魯生澤澤

生伯衍伯衍生子建子建生子馬父子馬父初

娶姜氏生損周景王八年魯昭公五年歷代

從祀稱爲篤聖門子居十哲首其間達子孫世
次可考者十二代遵爲漢博士十七代道宏爲
明帝孝經師二十二代鴻晉尙書四十四代正
宋太廟齋郎至六十六代燁明濟寧庠生弟煌
充四氏學奉祠生康熙三十八年閔煌援例陳
情議准爲設立博士閔煌之先世自晉遷歙又
自歙遷濟寧世爲主祀其兄燁有子衍籀委係
嫡裔三十九年奉

旨實授閔衍籀爲翰林院五經博士世襲

兗州府志

閔衍籀

六十
五代

閔興汶

六十六代康熙
四十年承襲

閔克峻

乾隆三十八年承襲

年承襲

三

書院

講德書院在學東文昌祠後三楹州人黃承芳等

建有碑

潘兆遴知
非瑣言

王天眷講德書院記畧大司馬紫垣靳公以丁

巳六月特膺

簡命由安徽巡撫都御史擢總河務建牙濟水受事後夙

夜匪懈往復河干築塞疏濬之勞身自先之是

以百廢具興州靈効順行且告平成矣戊午夏

因謁文廟旣棟宇傾頽蕪穢不治且故址半

爲民間侵蝕喟然傷之謂濟當南北衝要庠序

乃興賢育才之地今摧圯若是何以昭示四方
鼓勵來學也隨勅所司清釐隱占首捐俸金遴
管河道葉公司費運河丞任公督工經始於康
熙戊午四月落成於己未十月舉照壁戟門神
門大成殿尊經閣敬一亭兩齋房俱重建一新
又四週繚以重垣而兩廡明倫堂及啓聖名宦
鄉賢三祠則更加完美凡所需者皆捐之官民
間不與焉事竣公涓辰釋奠自僚屬以迄士庶
園橋門而觀者莫不忻忭舞蹈稱爲盛舉諸紳
衿謀欲建祠肖像以報公德公謙遜弗處無已

則於廟左隙地創書院一所俾歲時伏臘盼饗
長存咸奉公之教言爲大宗主因擬其額曰講
德蓋欲講究公崇學校之至意於無窮也已復
思歷來建祠勒石率於庭下第慮歲月遙深風
雨剝落猶於此舉未善今樹碣於堂中間揚挖
盛美使人入其堂如見其人肅然敬慨然慕且
翕然興起而景從也其有功名教非淺矣衆請
余爲記夫河臣之職在河耳明倫弼教似非其
責而公推其饑溺由已之念凡

國計民生所在不憚勞不惜費務爲遠大之圖卽修

學一端可知其治水矣昔王褒爲四子講德論以著治平之美及召見復爲聖主得賢臣頌以見上下相得之難

皇上勵精圖治遠邁漢宣而公久爲

宸衷所注佇見調元贊化澤被寰區寧止衣帶漕流獨泳恩波而已惜余不能鋪張盛美有愧吾家子淵耳公諱輔字紫垣遼東人康熙二十年辛酉五月立石

潘兆遴曰書院之建出自黃奕留之意而輪貫亦居十分之九先建於學西二老堂之北

成又建學東靳公不欲塑像並不令立生位衆
議鑄三條正面嵌石紀靳公東紀河道葉公方
恒西紀河廳任公璣大家避謝不肯捉筆鄭確
菴先生云余爲葉公作記可耳王少司空爲鄉
紳首領義不容辭乃倩之蘓人梅公燮嘉任公
記終不知誰作知非瑣言

南洲書院在魯橋運河上有仲子祠今廢泉河史

按書院恐卽在沙洲寺之旁

正學書院在城西南隅有正學祠嘉靖三年主事
楊撫建郡人劉概記後改祀宗聖或云正學祠明

知州張寰建

泉河史叅
震川集

○明劉概正學書院記士有位而闢邪崇正惓惓
罔遺餘力非見道分明卓有定力者未必能也
蓋禍福之口騰而聽者惑嫌疑之論起而爲者
沮是非得失之說肆而敏者怠所以苟且循襲
世無善治矧幾夫大道行而天下爲公亦難矣
工部都水楊君安世氏浙產也蚤有文名分司
於濟濟士從之遊君亦善誘無忝師席郡城之
坤隅地寬閒乃建書院誕肆經營爲堂者三口
麗澤曰敷教曰友仁爲宇者四曰斯取曰

曰利金曰相觀直中階爲祠堂四楹及施鴟尾
戶羅采悤以希直方先生從其父守濟州嘗讀
書於此其淵源之學造詣之德堅貞之操允宜
表勵後生迨夫死生榮辱適然遭遇之頃亦足
以明道學爰爲設祔主於中期永祀事祠左列
屋九楹右亦如之中門外西偏作神厨四楹周
垣斬斬門臨通衢廣二十二弓輪二十八弓大
書榜之曰正學書院門外植兩綽楔東曰光明
西曰正大規畫分明布置端軌輪焉奐焉巖峙
翬飛境旣闐寂制復宏雅諏謀於嘉靖甲申訖

工於某日君乃筮日告成師生徒舍菜正誼凜凜風教聿新僉議礪石以紀之夫都水君學力所至自信不惑闢邪崇正力致作人之方此其志將欲大道行而天下爲公乎可尙也已吾黨之士尙當聞風而邁沉酣載籍博雅典則以正學達諸文辭進而上之由下學以達天德敬義夾持闇然日修安所遇而確乎不拔以正學堅厥踐履又進而上之光明渾化和順從容優入於樂天知命安土敦仁之境以正學劭厥德業求無負士類無負師友無負上天生賢意夫然

後爲無負都水君加惠來學之舉也是役也郡
守黃侯與有力焉法當書

三省書院一名曾子書院卽正學書院也後爲頤

真宮今爲兗州府運河同知署

採訪下全

濟陽書院卽舊工部分司署今爲普濟堂

濟陽舊有書院歲久傾圯特爲新之

張公伯行行述

大司馬遂寧張鵬翮創立濟陽書院濟寧道蔣

陳錫及知州吳樞敦請陳孟養爲師有濟陽課

藝一冊行世

吳樞陳文介墓表

舊任城書院在總河軍門東漁山乾隆二十八年

運河道李清時建

濟寧書院久廢乾隆二十四年運河道李清時

查出南旺蜀山馬場諸湖隙地共七頃六十四

畝

與兗州府少陵書院地
中隔漕河不相連屬

因有復興書院之議

委臨清州州判谷敬儒查勘凡祭膳膏火等地

均屬義田皆免升科每年成熟之時濟寧州州

判同南旺主簿徵收變價上河庫以備書院修

脯膏火之用

定掌教修膳共一百三十兩肄業
生員十五名童生五名膏水二百

四十兩家人火夫皂
隸工食四十二兩

二十八年知州史頌以修

城餘銀七百兩置學舍次年河院葉存一始延

原任溫處道湘潭張九鈞掌教文卷

附題名

張九鈞

字甄齋湖南湘潭人雍正癸丑進士原任浙江溫處道

吳履綏

字門人辛酉舉人浙江石

儲寶書

字辰進士後為蘇州府教授江南宜興人乾隆庚

陳慎

字虛齋浙江錢塘人乾隆辛酉舉人

劉天寵

號梅峯陝西城固人後中乾隆乙未進士官內閣中書

錢浩然

號集齋江南吳縣人乾隆庚午舉人原任山東鄆城令後開復歷知萊蕪及嶧縣

張宿

字星海江西德興人乾隆丙子舉人

按以上七人並在漁山

新移任城書院在城外西南新司街乾隆三十八年癸巳總督河道姚公立德建

○姚公立德任城書院記濟州書院之設由來屢矣而南洲書院之在魯橋者尙不與焉有所謂止學書院者建自明嘉靖時工部分司管泉主事楊撫後改名三省隆慶時侵入運河同知署今爲曾子祠有講德書院者始於

國朝鄉宦黃承芳諸人爲靳公生祠之權輿書院特其名耳濟陽書院者在任城牖之西遂寧張文端儀封張清恪卽舊分司署爲之今廢爲普濟

育嬰堂任城書院之名見於香祖筆記有康熙
壬子武林沈蓀礪芳應河道總督聘主任城書
院之語按其時河督爲王公光裕州志修於後
一年而其名不載問之故老亦皆茫然或云在
青華洞之旁細訪之有石坊卧地署曰書院初
不言任城蓋康熙初胡氏義學耳其所以屢興
而旋廢者以無久遠之經費也

今上之二十八年安溪李公清時復建任城書院於漁
山在督河署之左知州史錦以公輸修城餘金
七百兩置舍宇公又以南旺蜀山馬踏三湖籽

粒地七頃六十四畝兩稅之入爲束修膏火近以新例河灘之地不得侵佔爲田捐而去之又學舍湫隘諸生無弦誦之所余蒞河之三年與兵備使吳江陸君謀所以擴充之知州藍君捐金改卜於城西南運河之濱草橋之北較之漁山屋舍增三之二而師生修膳之資亦幾倍之至經史子集與日用器具皆無外求者其用力亦云勤矣特是天下事創之甚難守之亦不易何以使歷久常新不似昔之屢興屢廢且或增其未逮焉不能無望於後之君子也至諸生之

游業其間者尙思以敦本力學窮經致用爲務
出則

國家之棟梁入則一鄉之矜式不僅以詞華科第相
炫耀其庶幾乎并書之以爲多士勗

○藍應桂任城書院記書院以舊在督河軍門之右
三十八年制府大司馬仁和姚公以其湫隘且
冠蓋旁午於弦誦非宜今臬使吳江陸公時爲
運河兵備使亦以爲言夫興事程功以仰承作
人之雅意正守土之職也於是相宅於西郊新
司街得王氏之居捐金九百餘兩易之而經史

子集圖書之藏几案牀榻之具庖厨溷浴之所
並余之所營購也若束修膏火日用之需有好
義諸紳士所捐白金若干又得舊書院售價六
百存於質庫歲收子金千兩而度支之費可以
無缺矣學舍房宇視舊增三之二其中曰樂儀
堂者講論會文之地堂之後學海樓上奉先賢
任城伯任子木主配以金贈濟州刺史翰林應
奉巨川李公公之節義文章同於宋之文山其
墓卽在今書院之北不遠里附祀於此宜也夫
書院之名其來已久

國家崇道右文於府州縣學之外所在有之其在省
治之地者院長有奏名之例規模宏遠任城
雖係濟州而延師皆聽命於河督與尋常州邑
不同今年三月又奉

旨以州直隸布政司領汶上嘉祥魚臺三縣三縣之士
亦例得肄業人文蔚起未可量也元時書院肄
業有明經者始升之國學今一例課以制義蓋
非制義無以明其能治經也士以制義進仍以
經義進耳且功令所頒四經三禮以及十三
經注疏具在無待外求肄業於斯者豈可不知

自勉以仰副制府公之盛舉哉書院之成在癸巳冬久欲立石以垂永久而倥偬未遑今始得文石而樹之講堂之右其經籍器具度支之目則附於後焉新司街者前明嘉靖時建器皿廠新司於此故名今改爲書院街云

○盛百二任城書院學海樓釋奠先賢任子記尙書姚公蒞任之三年始移任城書院於西郊草橋之北而兵備使陸公質左右之知州藍使君實經營之規模式廓迥異舊觀其中有學海樓上奉先賢任子栗主釋奠在焉任子爲七十子

之一載於家語及史記而生平無所見惟任氏譜云有詩傳及禮緯考及逸語三篇生魯襄公三十八年少孔子六歲其弟子有東門子高蒯伯儀皆他書所無當表出之者夫任城近聖人之居先賢遺跡往往而有如曾子仲子高子樊子鄭子是也何獨任子然諸賢或以流寓或子孫徙家因而立祠若任子固任國之族以國爲氏者任城以任國而名諸賢之於任城豈可以與任子比乎按鄭夾漈姓氏畧任有三宗其一黃帝之後爲任氏蓋卽國語所謂黃帝二十五

子得姓十四人之一也其後奚仲封於薛又曰黃帝之孫顓帝少子封於任又任爲風姓之國太昊之後主濟祀今濟州卽其地子孫亦皆以爲氏焉而今任氏譜系獨推本於奚仲康熙初知州陳烜作任子祠記兼用其說語涉兩岐鄭孝廉與僑作譜序特表風姓之說而亦未有決也余則斷以任子爲風姓之後無疑者蓋春秋二百四十年之間惟女子稱姓男子無稱姓者昔人論之詳矣任子果爲薛國之族任爲薛姓必不稱任矣且惟其爲任國之任是以唐追封

曰任城伯而宋之賜田廟戶亦並在任城又譜云任子居桃鄉卒於此母南宮氏亦葬於此兩漢書志桃鄉亦曰桃聚前漢爲侯國屬泰山郡後漢屬任城龐萌傳桃鄉在任城北六十里此其鑿鑿可據者宋時因鄭康成謂任子爲楚人改封當陽侯後人遂附會任子曾徙當陽而不知非也蓋春秋之末越與魯鄰及楚滅越皆爲楚地故莊子居濮陶朱居定陶皆以爲楚人譜云桃鄉之西有大皐界於楚亦名楚邱又云楚以上卿禮聘不就迹其生平未嘗舍桑梓而他

通鑑纂要卷八

五

適也或曰然則顓頊少子封於任獨不得有後乎曰唐書世系表於薛氏云出自任姓黃帝孫顓頊少子封任於任氏云自黃帝少子禺陽封任因以爲姓其說不同而下至奚仲皆云十二世則兩宗雖二而實一自爲矛盾旣知古無男子稱姓之例亦可勿論矣且任城固爲任而漢廣平任邑但言封任而不著其地安知非廣平之任乎任宿須句顓與風姓也實司太皞與有濟之祀見於左氏春秋夫譜系之紊久矣自當以左氏爲斷而就任城以言任又自當以風姓

爲是也。曰譜又云薛定侯封仲子於桃鄉其說
非歟。曰薛故城在滕縣南四十里去任城東南
二百里矣。桃鄉又在任城之北六十里則去薛
益遠安能以封仲子。夫近代之事猶傳聞異詞
况秦漢以前乎。苟非經史何足爲據。書院之初
成也。余來掌教事諸生荷當事諸公表彰先賢
及作人之雅化共立石以誌不忘而以文石之
詞來請按任子本有祠在汶泗坊舊記有不慊
於心者故爲稽其本末以質後之君子云。學海
樓下爲藏書之室故名而余更有說焉。法言云

百川學海而至於海邱陵學山而不至於山是

故惡夫畫也然則賢希聖則至於聖士希賢亦

至於賢夫豈可以自畫哉乾隆甲午六月某日

秀水盛百二撰

按石刻有誤字數處當依此

○題名

盛百二

字秦川秀水人乾隆丙子舉人前淄川令與修志書

沈升嶠

字舫蠡烏程人乾隆甲午舉人

書院藏書目錄

御纂周易折衷二套

御纂性理精義一套

御製佩文韻府二十套

韻府拾遺二套

淵鑒類函二十套

歷代賦彙十套
全唐詩十二套

欽定書經傳說彙纂二套

欽定詩經傳說彙纂四套

欽定春秋傳說彙纂四套

御選唐宋文醇二套

御選唐宋詩醇二套

內府板十三經 共十七套

內府板二十三史 共七十七套

內府板通典六套

內府板通考十六套

內府板通志二十套

國語註解一套

戰國策一套

古文眉詮四套

宋詩抄四套

詞綜一套

尚書釋天二本

濟寧州志一部

濟寧直隸州志一部

任城書院交當生息銀兩分別支用各款

一交當紳士樂輸銀三千兩按月二分起息每

年得息銀七百二十兩遇閏加增又續添舊

院銀六百亦以二分起息每年一百四十四兩

一息銀按季交庫由州解道轉發監院泉

廳支放一掌教每歲束修二百四十兩膳金

八十兩節儀十二兩一掌教開館酒席銀二

兩一每月十六日官課掌教酒席銀一兩二

錢一每月初六二十六課掌教酒席銀六錢

共計一兩二錢一內課生童二十四名每名

每月膏火銀一兩每年共銀二百八十八兩遇

閏加增舊例正月臘月停課每年算十個月每

月給銀一兩二錢河道陸公改為每年每月銀

一兩按月通給一課卷每本六釐一看門

人役一名每月工食銀一兩計十二兩一廚

子一名每月工食銀九錢一年計十兩八錢

一火夫一名每月工食銀六錢一年七兩二錢

一掃堂夫一名每月工食銀四錢每年四兩八

錢以上工食遇閏加增一監院書辦飯食

紙筆每年給銀八兩一運河道濟寧州衙

門

書辦均右辦理書院一切事宜每年各給銀八兩共十六兩一修理書院及家伙什物俱由州衙門隨時備辦

龍門大社在學宮西明陝西布政司右叅政郭汝

西圃後爲文社外有龍門坊

採訪

鄭與僑曰郭大叅公西圃其孫重熙重傑兩文

學闢講堂建號舍多士課習其中陳太常旭窗

伯友王璽鄉坦山

命新汶上人

汪水部孺石

邦柱長洲人工部分

司三先生遞爲主盟士以得與爲榮因扁其堂

曰龍門大社

名園記

明呂一經題龍門社壁苦憶任城舊酒樓蘆花

滴雨夜維舟
衝星不散飛
龍氣別路偏
驚一雁
秋

金鄉縣

儒學始於唐開元在縣治西宋紹興中徙北門裏
今岱嶽祠也金大定間縣尹聶天祐遷於縣治東
元至元間縣尹劉源牛天麟周伸閻遜修明洪武
初縣丞李瑾重修學士吳寬記明倫堂在廟後崇
聖祠在堂東名宦祠鄉賢祠夾泮池左右萬歷時
知縣楊楫劉廣譽天啟時舉人張文燦崇正初知
縣李國泰皆重修

國朝貢生張士表教諭王克生知縣沈淵王之錡饒
學燕麥子淳王天秀教諭遲逢元並有重修之績

其規制皆仍明舊制也惟明德新民二齋久廢而

雍正八年奉文創建者忠義祠在鄉賢祠南

據縣志

按雍正中奉文建者爲忠義孝弟祠若分建

尚宜有孝弟祠若合建不當節去二字

講文堂

一作亭

在明倫堂東墳書臺上

元縣尹劉思義建

臺舊名焚書元徐容齋云當作墳書明宏治間

副使邵寶扁曰文儒

通志

王尚珏詩戔戔黌舍東奕奕高臺峙蒼翠

鬱藤

蘿突兀倚城雉金鄉故平衍一簣何由爾或云

焚書時餘燼之所累斯語本無稽荒誕尤可鄙

公理與輔嗣實爲此邦士至今城北隅著書有
餘址安知非後人封築寓仰止卓哉徐容齋與
邵二泉更名表仁里劉尹構高軒講文詔後起
遠挹陽岫雲近映壽谿水故蹟想遺風前賢猶
可企作詩語邦人豈爲遊觀美

入學十五名

學田四頃八十四畝三分八釐一等地每畝徵銀
一錢六分二等地每畝徵銀三分三等地每畝徵
銀二分又嘉靖間教諭趙守道增置田三頃六十畝
會課田九頃八十五畝有奇內明萬歷知縣彭鯤

化置田三頃魏照乘置一頃天啟間知縣李國泰
五頃五十畝有零鄉宦秦士奇施田三十五畝三
分周永春有會田記見縣志

山陽書院知縣沈淵初建乾隆二十五年知縣麥
子鴻重建擴舊增新有田一頃八十八畝餘銀六
百兩每年生息以爲束修膏火費

○嘉祥縣

儒學在縣治南金皇統間嘗於嘉祥村東北山口
鎮創造已爲河患學毀鄉進士翟三俊倡建於
坐山之右繼又爲河所淤大定間知縣賈直

蒨山之陽金季又毀元初邑人常信之曹子和輩
卽故址創殿四楹至元三年縣尹劉榮祖始遷今
地至正三年縣尹劉敬重修後復圯明天順八年
知縣張慶鼎建齋堂成化間知縣高淳修建門廡
知縣劉淵增置號舍嘉靖間縣丞韓文黷重建文
昌祠元人趙衡正翟師軻蘓若愚明大學士許彬
各有學記名宦鄉賢二祠俱在學宮

國朝順治八年知縣張泰昇教諭霍希賢訓導呂祚
蕃捐募重建明倫堂康熙五年鄉賢祠毀生員杜
貞恒重建十一年啓聖祠毀教諭侯大武募修康

熙五十六年知府金一鳳知縣宋公璧重修

克州府志

入學十二名

學田一頃二十七畝五分每畝徵銀四分五釐

宗聖曾子書院遺址在南武山下今專廟之東創

廢俱無考明萬歷間邑令田可貢改建於城中萌

山之陽仍照專廟例中祀宗聖曾子以述聖子思

子亞聖孟子配享以先儒陽膚樂正子春公明儀

沈猶行公明高單居離公明宣公孟子高孟儀子

襄從祀後爲啓聖祠奉先賢曾氏哲以元申華西

從祀

欽賜曾氏世襲翰林院五經博士第在城內

曾質粹

五十九代裔先世避亂南遷居江右明嘉靖間詔訪曾子後裔應詔來東十八年授

世職

曾

吳

六十一代未襲早卒

曾繼祖

六十一代未襲
賜封修職郎

曾承業

六十二代萬曆五年襲

曾宏毅

六十三代崇正元年襲

國朝

曾文達

崇正十四年襲
順治元年復襲

曾貞豫

六十五代康熙七年襲

曾尚溶

二十六代康熙二十九年襲

曾衍懋

六十七代雍正八年襲

曾興烈

六十八代乾隆四年襲

曾毓樽

六十九代乾隆二十六年襲

○魚臺縣

儒學初在舊縣治西北元季燬於兵明洪武二年
知縣謝榮祖重建嘉靖九年河決傾圯十五年教
諭宋希文重建殿廢四十二年縣丞張仕大爲修
建規制乃備

國朝康熙三十年知縣馬得正重修乾隆二十一年
縣治以水徙知縣馮振鴻移建新治之東北隅

南北一百二步東西六十步 大成殿七楹兩廡

各九楹戟門三楹各宦鄉賢忠義孝弟及節孝祠
省牲所更衣亭並在戟門外 崇聖祠在殿東北

明倫堂在殿後敬一亭在明倫堂後

府志
卷六
縣志

入學二十名

學田原額二頃五十畝內租地一頃三十六畝每畝徵銀一錢四分九釐五毫七絲又地一頃一十四畝每畝徵銀四分八釐四毫二絲外知縣馬得

正補學田二頃六十畝九分五釐

兗州府志下全

崇德書院在穀亭鎮嘉靖間邑人韓襄偕隨顯建
有講堂齋舍

棠泮書院在穀亭鎮嘉靖間分司主事楊撫建今
廢

馬公書院在舊縣城知縣馬得正建今廢

饒公書院在縣署東知縣馮振鴻建

義學在縣署東知縣馮振鴻建

五馬路學田二畝六十油小長正蠶

四油每油蠶四長八蠶四臺

油蠶一蠶五臺

